

ርዕሰ ሰዶድ መጽልሰ ሱዳን ዲብ ኤረትሮፕ ሐጫር ናይ ሸቅል ዝያረት ወደ

ርዕሰ ሰዶድ መጽልሰ ሱዳን ጀነራል ዐብዱልፈታሕ አልቡርሃን ዲብ ኤረትሮፕ ሐጫር ናይ ሸቅል ዝያረት ወደ።

ጀነራል አልቡርሃን የም 4 ሰብተምብር ሳዕት 10፡30 እድንያይ መጣር አስመረ ዲብ ለአተ እቱ ወክድ ርዕሰ ኢሰይያስ አፍወርቂ ትክበተዩ።

እለ ዝያረት እለ ጅዙእ ናይለ ክልኢተን ድወል ዕላቀት እግል አተረዶት ናይ ሕበር አህምየት ዲብ ላቡ ጋራት አፍካር እግል መትባዳል ፍንጌ ክልኤ ሩኣሳእ ድወል ለትገብእ ልምድት ናይ መትጋማይ በርናምጅ ተ።

ርዕሰ ሰዶድ መጽልሰ

ሱዳን ጀነራል ዐብዱልፈታሕ አልቡርሃን ዝያረቱ እበ ክሰስ እግል ኤሪነ ዲብ ለሀበዩ ሐብሬ እለ ልምድት ሕውትነት መትሰዳዳይ ዝያረት ተአምርተ ትርድት ሸዕብየት ወታሪካይት ዕላቀት ኤረትሮፕ ወሱዳን ክምሰልሁመ ፍንጌ ሚርሐት ለትገብእ መትጋማይ ክምሰልተ እት ሸርሕ ዋድሕ መባዋር ኤረትሮፕ ዲብ ቀድየት ሱዳን ሐመደ።

ርዕሰ ሰዶድ መጽልሰ ሱዳን ጀነራል ዐብዱልፈታሕ አልቡርሃን ዲብ ኤረትሮፕ ለወደዩ ሐጫር ዝያረት እንዴ አትመመ እተ አምዕሉ ሳዕት 1፡ 30 ሐቀ አዝህር ትሳረሐ።



ሰላላ-ሳልሕ ዓብደልጃድር

ቃኑናይ አትአመሮት

ዕልብ 134/2026

ቀዋኒን ሐረኮት ዕምለት ነቅፈ

ማደት 1. - አርእስ ሐጫር

እሊ ቀዋኒን እሊ፡ “ቀዋኒን ሐረኮት ዕምለት ነቅፈ፡ ቃኑናይ አትአመሮት ዕልብ 134/2026” እንዴ ትበህለ እግል ልትሰሚ ቀድር።

ማደት 2. - ለአፍገረዩ በዕል መዝ

እሊ ቀዋኒን እሊ፡ አዋጅ ባንክት ኤረትሮፕ ዕልብ 93/1997 ማደት 5፡ ክምሰልሁመ ማደት 52 እግል ባንክት ኤረትሮፕ እብ አሳሰለ ለሀይባሃተ ሰልጠት ፋግር ህለ።

ማደት 3. - ለሰሞሕ ቅያስ ሰላዲ

ሐረኮት ዕምለት ነቅፈ እብ ባንካት ወመአሰሳት ማል እግል ልግበእ ሰበት ቡ።

(1) ለገብእ ነፈር ዝያድ ዕስረ ወሐምስ አልፍ (25,000) ነቅፈ

(2) እብ አሳስ ለተሓየስ ቀዋኒን ለለኡቴ ግብር፡ ቃኑናይ አትአመሮት ዕልብ 119/2012

(i) እት ደረጃት “ሐ” ለትረተበት መአሰሰት ብሕተ፡ ዝያድ ሕምስ አልፍ (50,000) ነቅፈ

(ii) እት ደረጃት “ለ” ለትረተበት መአሰሰት ብሕተ፡ ዝያድ ምእት አልፍ (100,000) ነቅፈ፡ ክምሰልሁመ

(iii) እት ደረጃት “ሀ” ለትረተበት መአሰሰት ብሕተ፡ ዝያድ ምእት ወሕምስ አልፍ (150,000) ነቅፈ

ለገብእት ሰላዲ እግል ዝያድ ዐስር ሐምስ (15) አምዕል ምስልክ እግል ትጽብዋ ኢልትሰመሕ።

(3) ኩቡቴ እበ አለበ ምስምሴ፡ እትለ ማደት እለ ዝያድለ ሰሞሕ ቅያስ ሰላዲ፡ ምን ዐስር-ሐምስ (15) አምዕል ወለዐል ምስሉ ለአጽነሐ፡ ምስዳር ቃኑናይት ትትነሰእ ዲቡ።

ማደት 4 - ቀዋኒን እት ፍዕል ለልውዕል እቱ

እሊ ቀዋኒን እሊ እት ጀሪዶት አዋጃት ኤረትሮፕ እንዴ ትጠበዐ ምነ ፈግር ዲብ አምዕል እንዴ አንበተ፡ እት መዓል ልውዕል።

አሰመሬ፡ 9 ሰብተምብር 2026

ባንክት ኤረትሮፕ

ወዛረት ተዕሊም፡ እድንያይት አምዕል አብደዮት ቅዌት ትዘክር

እት በርናምጅ አብደዮት ቅዌት ሰጅልት ለህሌት ዐውቴ እግል ትትሐፈዝ ጅህድ ሕበር ናይ መጽተመዕ ክም ለአትሐዜ፡ ወዛረት ተዕሊም እብ መናሰበት 8 ሰብተምብር እድንያይት አምዕል አብደዮት ቅዌት እተ ሓለፈተ ልእክት ሸርሐት።

ወራታት አብደዮት ቅዌት ምን መደት ንዳል እንዴ አንበተ ልትከደም እሉ ክም ዐሉ ሐቆ ሕርየት ህዩ ምን ሰነት 2000 ኦሮ ምን አውለዊያት ሕኩመት እት ገብእ፡ እት ክሉ አቃሊም ወእብ ክሉ ሀገጊት ዐድነ ልትሰርገል ለህለ ወጠንያይ ዳይ ክምቱ ለሸርሐት ለልእክት፡ እት ሰነት 2008 እብ ደረጃት ወጠን 65 ምእታይት

ለዐለ ቅያስ አብደዮት ቅዌት፡ እት ሰነት 2025 እት 80 ምእታይት ክምሰልዚደ አፍሀመ።

እሊ እብ ጅንስ ልትርኤ እት ሀሉ፡ ቅያስ አብደዮት ቅዌት እት አዋልድ አንሳት 57 ምእታይት ለዐለ እት 72 ምእታይት፡ እት ወላድ ተብዕን ህዩ ምን 74 እት 85 ምእታይት ክም ዚደ እት ትሸርሕ፡ እበ ገብእ ጅህድ እት ፍንጌ ክልኢቱ ለጅንስ ለዐለ ናይ 17 ምእታይት ፈርግ፡ እት 12 ምእታይት ክም ጨበ እብ ተውሳክ ሐበረ።

ሰጅልት ለህሌት ፍገራት ለተአትናይት ምንማተ፡ እት ገሌ አቃሊም ለህሌት ፍገራት ድህር እግል ትትሓየሱ፡ አቃሊም እት ፍገራት ናይለ እት 2025 ለገብእ ሕፍዝ

እንዴ አተርከዘው ወጌማም ወደው፡ እት አደቀቦት አሳስ ተዕሊም እብ ዓመት፡ አብደዮት ቅዌት ህዩ እብ ፍንቱይ እብ ስታት እግል ሊግሶ ወዛረት ተዕሊም አትፋቀደት።

ናይ መስተቅበል በራምጅ እበ ኸሰስ ህዩ፡ እተ ተልየ 5 ሰነት እተ በክት ራክብ ለኢዐለ እዳራት ደዋይሕ ወዐዶታት ክምሰልሁመ እተ መሻረክት ድህር ለትረኣ እቱ አቃሊም ተርኪዝ እንዴ ገብኡ፡ ቅዌት እግል አብደዮት ክም ከድመ ወደሐ።

8 ሰብተምብር-እድንያይት አምዕል አብደዮት ቅዌት እብ ደረጃት ወጠን እግል 25ይት፡ እብ ደረጃት ዓለም ህዩ እግል 60 ኢነተ ትዘክር ህሌት።

ምግብ፡ ጌማም ወራታት ጀብህት ሸዕብየት እግል ዲሞቅራጥየት ወዐደለትገብእ

መደራእ ምዴርያትት ወእዳራት ደዋይሕ ክምሰልሁመ ወካይል ወጠንያይ መሓብር፡ ወራታት ጀብህት ምስል ናይ ሐል ስታት በራምጃቶም እንዴ አትራአው ዝያድ እግል ልክደዋ፡ መስኡል ሸኡን ተንዝሚ ጀብህት ሸዕብየት እግል ደመቅራጥየት ወዐዳለት አሰይድ ዩስፍ ሳይቅ አትፋቀደ።

እት ገብእ ጌማም ወራታት ሰር ሰነት ናይ ጀብህት ሸዕብየት እግል ዲሞቅራጥየት ወዐዳለት እት አቅሊም ምግብ እተ አስመዐየ ከሊመት አሰይድ ዩስፍ፡ አደቀቦት ጀብህት አውለውየት እንዴ ተሀየቦዩ ፈድለ

ትከደመ እሉ፡ ሸክሉ ወመትዝመ አሰክ ለደህረት ሸክል እዳረት ክም ትክረ ወደሐ።

መስኡል ሸኡን እዳረት ጀብህት ሸዕብየት እግል ዲሞቅራጥየት ወዐዳለት አሰይድ ሹሞንዲ ዐንዳማርያም እተ እግሉ ቀደመ ተቅሪር፡ እት ወራታት እጅትማዕየት፡ እቅትሳድ፡ መንገፎ ወመትዝማ መሻረክት ዛይደት ናይ ሸዕብ ክም ተአከደት እት ሸርሕ፡ መትዝማ ተእሂል፡ ተዕሊም ዕሉም እጅትማዕየት፡ ሰሚናራት ወአትፋዘዶት ምነ ዐባዩ በራምጅ ክም ዐለው ሐበረ። መሻረክት እተ ትቀደመ ተቅሪር

እንዴ አተርከዘው፡ እት መስተቅበል ለገብእ በራምጅ ሸቁል እግል ልትሰርገል ለሰዴ አራእ ቀደመው።

አሰይድ ዩስፍ እት ካቲመ እተ አስመዐየ ከሊመት፡ አንፋር ጀብህት ምስል ቀደሞት ከደማት እንዴ ትጸበጠ እብ ሸዕብ ለቀርብ ሸካዊ እንዴ አተንሰው ሐብሬ ሻፍገት እተ ትከሰስ ጀህት እግል ለሓልፎ፡ እት ወሰዶት መትዝማ ካድም ዋቂ እግል ልትሰርገል፡ ፈዛዐት መጽተመዕ ለወቅል አትፋዘዶት ዝያድ እግል ልትከደም እሉ፡ ክምሰልሁመ አንፋር ጀብህት እት ፈዓልየት በራምጅ ተረት ዛይደት እግል ለአግዱ አትፋቀደ።

ስዊዘርላንድ፡ ዝክረት ሄለል ሰብተምበር ወ50 ሰነት መትከሳስ መድረሰት ሰውረት

እት ስዊዘርላንድ፡ ዝክረት ሄለል ሰብተምበር- 65ይት ሰነት መትከሳስ ንዓል ሸዑብ ኤረትርዮ ወኪላዊ ደህባይ መትከሳስ መድረሰት ሰውረት እብ ነደረት ተዐየደው።

እቲ ምን ክለ ስዊዘርላንድ ለትጀመዐው ኣንፋር መድረሰት ሰውረት ወመስኢሊን መሓብር ገቢል ለሐድረው እቲ ዲብ ዮም 5 ሰብተምበር እት ጅኔሽ ለገብኣት መናሰበት፡ መስኢል ሸኡን ሸዑብ ወጃልያት እት ስዊዘርላንድ ኣሰይድ እስማዒል መሐመድኑር፡ መዕነት ክልኢቱ በራምጅ ዝክረት ለትኸሰስ ክለመት ኣሰመዐ።

ምን መመቅረሐት መናሰበት



ዝክረት 50 ሰነት መትከሳስ ስዊዘርላንድ መድረሰት ሰውረት ኣሰይድ ቱድሮስ መለስ እብ ተረቲ፡ ተእሪክ ተእሲስ ወተጠዉር መድረሰት ሰውረት ሐቀለ ኣብረሀ፡ ጀብሀት ሽዕብየት እብ ዐለት እለ ሩእየት

ዋድሐት፡ እት መርሐለት ስድት ለኣሰሰት መድረሰት ሰውረት፡ ስቡላም ወሕቡናም ኬድመት ወጠን ክም ኣፍሬት እንዲ ሸርሐ፡ ዝክርያቶም እግል ለኣጀድዶ ወመብደኣም እግል ለኣሰቡቶ ምን ቀድረው፡ ኣሰናይን ቤል።

ለእሕትፋል፡ መንበሮ መድረሰት ሰውረት እብ ፈን፡ ፊልም ወድራመ ለሸፊሕ ፈርያት ለ'ተለ ዐለ።

እት ክዌት፡ ቀጠር ወባሕሬንመ እለ መሰል እሕትፋላት ገብኣ።

ክሉ ለእሕትፋላት፡ እብ ከሊማት፡ ጽበዋ ፈን ወቅሰስ ጋምል ክም ዐለ፡ ምን ለትፈናተ ድዋራት ለበጽሐተነ ሐብሬ ተኣፍህም።

ዐንሰቡ፡ ደረሰ ጃእዛት ነስኣው

እት ኣቅሊም ዐንሰቡ፡ ምዴርያት ክረን ወዴላበርዕድ፡ ዲብ ወጠንያይ እምተሐናት ፍገራት-ሰኔት ለኣምጽኣው ደረሰ፡ እት ዮም 1 ሰብተምበር ጃእዛት ነስኣው።

እብ ኣሳስ እለ፡ ዲብ መዲነት ክረን ለህሌት መድረሰት ምግባይት ወካልኦይት ደረጃት ሮሪ፡ ዲብ ወጠንያይ እምተሐን 8ይ-ፊሰል ሰነት ኣካዳምየት 2025/2026 ምን 90 ወለዐል ንቃዋ ለኣምጽኣው 10 ደረሳይ፡ ክምሰልሁመ ዲብ ወጠንያይ እምተሐን 12 ፊሰል 3 ወምኑ ወለዐል ለኣምጽኣው 14 ደረሳይ ኣትናየተት።

ምዴርላ መድረሰት መምህር ሃብቶም ተስፋጽዮን ዲብሊ ኣሰመዐየ ክለመት፡ ፍገራት ወጠንያይ እምተሐን 8ይ ፊሰል እቲ ሐልፊየ ሰለሰ-ሰነት ምን 40 ምእታይት ዲብ ሐድ 70 ምእታይት፡ ፍገራት

ወጠንያይ እምተሐን 12 ፊሰል ህዩ ምን 18.5 ምእታይት ዲብ 31.2 ምእታይት ክም ትወቀለ ሸርሐ።

መስኢል መኣሰሳት ተዕሊም

እስታዝ ዮሴፍ ዑቕባሰላሴ እብ ጀህቲ፡ በቃዐት ምህሮ እግል ትትኣክድ ገብእ ለጸንሐ በራምጅ ነፊፊ ክም ሀለ እንዲ ሐበረ ፍሬ ጅህድ ሕበር ናይ ጀሃት ተዕሊም፡ መጅተማዕ ወደረሰ ክምሰልቱ ኣብርሀ።

እት ዴላበርዕድዎ ካልኣይት ደረጃት መድረሰት ዐወት፡ ዲብ ሰነት ድራሰት 2025/2026 ዲብ ወጠንያይ እምተሐን 12 ፊሰል ፍገራት ሰኔት ለኣምጽኣው 18 ደረሳህ ኣትናየተት።

ምዴር ኣማኑኤል ዘሚካኤል ወመስኢል መኣሰሳት ተዕሊም ናይለ ምዴርያት እስታዝ ሰለሙን ንጉሴ ፍገራት ደረሰ እት ልትወቀል መጽእ ክም ሀሌት ወእግል ትዳይም ክድመት-ሕበር ክም ለኣትሐዜ ኣፍህመው።

እብ ብዕድ እንክር፡ ዲብ ምዴርያት ኣሰማዋ፡ እብ ጅህድ ሕበር መድረሰት፡ መደርሲን ወዋልዴን፡ ፍገራት ደረሰ እብ ዓመት፡ ዲብ ወጠንያይ እምተሐናት ህዩ እብ



ፍንቱይ ፍገራት ደረሰ ክም ሐሰት፡ እት ዮም 28 ኣገስት ዲብ ኣሰነደ እት ገብኣ ጌማም ተሐበረ።

መስኢል ክደማት ተዕሊም ዲብሊ

ምዴርያት እስታዝ እብራሂም እኩድ፡ ፍገራት ደረሰ እግል ትትወቀል ገብእ ለጸንሐ ጅህድ፡ ዲብ ሰነት ኣካዳምየት 2025/2026 ዲብ ወጠንያይ እምተሐን 12 ፊሰል

ለነጅሐው ደረሰ ዐደዶም ምስለ ቀደመ ለዐለት ሰነት ዲብ ልትርኤ እብ 14 ምእትይት፡ ዲብ ወጠንያይ እምተሐን 8ይ ፊሰል ህዩ እብ 3 ምእታይት ክም ዐበ ሸርሐ።

ዲብሊ ጌማም፡ ዐደድ ሐሊፍ እብ ኩሉ ደረጃት ምህሮ 74.4 ምእታይት ክም ዐለ፡ መሻረከት ደረሰ ህዩ እት ለዐቤ ትመጽእ ክም ሀሌት በርሀ።

ምዴር ምዴርያት ኣሰማዋ ኣሰይድ መሐረን ተኸለኣብ እቲ ኣሰመዐየ ክለመት፡ ወቅል ፍገራት ደረሰ እግል ትዳይም፡ ቀድረት መደርሲን እግል ትትወቀል ለትገብእ ፊራሮ እግል ተኣተላሌ ኣትፋቀደ።

ዲብሊ መናሰበት፡ ዲብ ወጠንያይ እምተሐን 12 ፊሰል ንቃዋ ውቁል ለኣምጽኣው ደረሰ መድረሰት ቦርዲን ኣሰማዋ ጃእዛት ተህየበው።

ድጌ ወድባርወ ዝላም ዐገብ መደረት ኣጅሬት

እት እዳረት ደዋይሕ ኤሽንኪት-ሙዲርያት ድጌ እት ኣምሱይ 4 ሰብተምበር ለዘልመት ዝላም ዐገብ እት ኣብያት ሰከን፡ መኣሰሳት ወርዘቅ ዕጩይ መደረት ኣጅሬት።

እብ ኣሳስል እንዲ ደንገረት ለበጽሐተነ ሐብሬ፡ ዝያድ 130 ትክል ወድቅ እት ሀለው፡ ኣፍሱል መዳርሰ ወመርከዝ

ዓፍየት ሞገራይብ ዚንገሁ ትገለዐ ወእት ዕጩይ ዐባዩ ደማር ክቡድ ጀረ።

እት ሙዲርያት ድባርዋም እት ዮም 4 ኣገስት ዝላም ዐገብ፡ እት ዐዲ-ሕዝባይ፡ እምኒ-ጸሊም፡ ዐዲ-ነኹዖ ወታኹተ እት ብቅል መደረት ኣጅሬት።

እብ ኣሳስ ሐብሬ መክተብ ሐርሰ ናይለ ሙዲርያት፡ እት 344

ሄክታር ዝሩእ ለዐለ ማሼላ፡ ዕፉን፡ ሽዒር፡ ሽንሬይ፡ ጣፍ፡ ባልዶንገ ወዐተር ደማር ዐቢ ክም ጀረ እቲ፡ እት ታኹተ ወዐዲ-ሕዝባይ እት ሐድ 25 ሄክታር ልትዐመር ለዐለ ሐምሌ ህዩ በረድ ኣብደዩ።

ገሌ ምን በደ ብቅል፡ ምድሩ እብ ድግማን እንዲ ተሐረሰ ቅርጡዋ ልትዘረእ ክምሰል ሀለ፡ ወኪል ኤሪን ሐበረ።

ምዴርያት ፎርቶ-ሳው፡ ማርሓተ ተሐሬ

ዲብ ምዴርያት ፎርቶ-ሳው፡ ምን ዮም 12 ኣሰክ ዮም 29 ኣገስት ዲብ 4 እዳረት ዳሕየት ሕርያን ሙደራእ ደዋይሕ ወመመቅርሐት ሸቅል ገብኣ።

እብ ኣሳስ እለ፡ ሰከን እዳራት ዳሕያት ዋካይ፡ ኩለንቴባይ፡ ታማራት፡ ኣዲባሪ፡ ግርማይኩ፡ ፈዳዳብ፡ ተልኣይ፡ ዓሌት፡ ሆሚብ፡ ሞሎቤር፡ ርብዳ-ለዓል ወተሓት፡ ክምልሁመ ክልኤ እዳረት ዳሕየት

መዲነት ፎርቶ-ሳው፡ ለመርሕዎም 6 ኣንሰይት ለብእቶም 28 መስኢሊን ወመቅርሐት ሸቅል ሐረው።

ናይ ዶሉ ምዴርላ ምዴርያት ኣሰይድ ኣረጋይ መብራህቱ ዲብ ሀበዩ ሐብሬ፡ ለሕርያን ናይ ክድመት ወቅቶም ለተመ ማርሓት እንዲ በደለው፡ ሸዑብ ታምም ክደማት እዳረት ለረክቦ ዲቡ መጃል እግል ልዋፋሕ

ለኣመመ ክምቱ ሸርሐ። ኣንሳት ክም መስኢላት ወመመቅርሐት ሸቅል ሰበት ተሐረየ፡ ዲብ ትትወቀል ለመጽኣት ፈዛዐት መጅተማዕ ወበቃዐት ኣንሳት ዲብ እዳረት ለለኣርኤ ክምቱ እንዲ ሸርሐ፡ ሕሩያም ለረፍዐወ መስኢልየት-ክብድት እንዲ ፈህመው እብመዕጸም ወመትሰባል እግል ልክደሞ ኣትፋቀደ።

ኤፌትርዮ፡ ጃእዛት

ክል ኣርቡዕ ለትጠ'በዕ ጀሪደት

መዳልያይ፡

- መሐመድ እድሪስ

ለይኣውት ወኣርተየት

* ዘህረ ዐሊ

* ፋዋን ኣድም

ተለፎን፡ 121797/201820 (258)

ፋክሲ፡127749፡ ዕ.ሰ.ቡ፡ 247

ተውዝዕ ጀሪደት፡

ተለፎን፡163471-07588045

ኣትኣመሮት፡

ተለፎን፡ 125013፡ ዕ.ሰ.ቡ፡ 1284

ፍጉር ፍጉረት

3^ይ ወናይ ደንገበ ክፋል

ለወክድ ለሀይ፡ እግል ክልዶል እት ሓያቹ እግል እንበሩ ለእተምኔ፡ እት ፅምር ሓያቹ ሽዕር እቡ ለየአምር ሽዑር ሰዓደት እቡ ለሽዐርኮ እቱ ወቅት ቱ ለዐለ፡ ሓያት በደል እት ጽልመተ እትዋደቅ፡ ወአንኮልል ዐልኩ፡ እት በርሀት ባናህ እብ ነሐር ፋዬሕ እግል እግናድል ወሄርር፡ ትምቡረት ሰአየት ከሬት እግልዬ።

አቤ! እሊ ለፈታይ ወአባይ እኪት፡ ወገልገላይ ከሸንሂት ደሚር ወንፍሰ ትፈቲየ ለይዐለ እግሉ አናቱ። ወሀ ጀለ!! ክምሰል በርቅ አደሐ ጸዐደ፡ አነ ወዓርባይቹ እት ሻርዕ እዲነ ጠበሽ ትበሀልኑ፡ እት አድሕድ። እምበል ካልአይ ወሳልሳይ እት ጢሾ ሕዋሌ፡ ኖሰነ ተዐገልኩ፡ ክምሰል ሰብ ወድጃብ እንዲ ኢንትረደድ፡ አድሕድ ፈቱኔ። እግል ቀርድ ፍጉረት እት ንሄርር ቀርድ ስኒን አግዳኔ።

ምን አድሕድ ዕንዋን ሕድ ትባደልነ ከትፈናቱኔ። ንዩይነ እብ በራኣት አድሕድ ትከበተ። ክለ ለኣለትነ ህዩ ምን አሕድ ለኢልትፈንቱ ሽዑር እት ሐንቱ ሰይጠረቱ ወደየ ምኒኔ። ምን ሰልፍ መዋጀህትነ ህዩ እግል አሕድ ፈቱኔ። ሕብዕት ልብዬ አፍገርኮ እግለ። ወሕብዕት ልበ ደግመት እግልዬ። ሰሐቅኮ ወትለወቅኩ። ፈርሐኮ ወቀረድኩ፡ ህታመ ክምሰልዬ ዐለት ለሐለተ። ቅርጡናይ ገዴታዬ ትፈሰሰ። ለድሙል ዐለ ደሚረ፡ አርወሐት ዘርኡ። ለእግል በእስ ወሐምያት ኢትፈቱ ፍጉረት ልቤታየ ጸልዐት በዲሩ ሰፊ። ለአፍ ሐሊብ መጠቅ አፋታዩ፡ እብ ረኪብ ምራደ ሰሐቀ ወልቤታየ ኣተቅረደ። ዐጃይብ ቱ ወዳይ እሊ ኮን! ሰር ዕድም አሰረ ከኢትማጸአ ወአነ ወፍጉረት እት ፈጅኣት መዋጀህትነ መስተቅበል ዲማነ ትበኔ።

አርወሐቹ በደል እት በይን ወአጪንባይ ትትናዘዐኒ ለዐለት፡ ዐግሎ መሐበር ሐዜት እቹ። ለእግል እንዲ ይእርኡ ፈቱኮህ ፍጉረት፡ ክምሰል ርኡኮህ፡ እዲነ በራይር ገብኣት እግልዬ። ቱለልዬ እግል ክሉ አትፈከረ ወአትዐጀበ። ላመ ህኑን ወመጥሙስ ሳምያምዬ ለዐለው ሔምየት እብ መብህሎም ትዑሳም እት እንቶም እብ ስሜት(አትንበሊቹ) እግል ልትላከውኒ ትቀሰበው።

አዜመ ምሰል ኡዳምዬ ክምሰል አምሐበርኮ እግል ትምኔት ልብዬ ልክሉኡኒ ትትሳሰዐው። ሰፍሉል ለዐለ ደሚርዬ፡ እብ መዋጀህቹ ምሰል ፍጉረት ዐድ ወከደን ፍኩክ እግሉ እት እንቱ፡ እግል ልካሙሹ ሐር ኢቤለው። ዐጀብ! ሰኔት ኖስ እምበል በዐለ ምን ገብእ ደልየ ወለአምረ! ለትደዌ እቹ ምን እዲዬ እግል ልንዝዐው! ኮንዶእ! እለ ላቱ ኢትገብእ ወጋብኣት ኢኮን። ግድም ለአልባብ ሐቀ

አድሕድ ተሀገኑ ወለቅሰመት እት አድሕድ ገብኣት፡ ተሪፍ ምን ፍጉረት የሀለ።

“ኬን በለ። እለ ቀደምከ ህዲት ወዕይልት ዐለት። እንተ ትንእሽ ምነ ወገህ ግበእ!፤ ህተ ስነት እምካተ። ሃዲ ኢትግበእ! ውላድ ጸርከ ዓባይ ሚ ትአውድ!? ዐሽል እንዲ ኢልትከዬ እትኩ ሚ ሐክመተከ ከአዜ መበል ተሀዲ፡ ህሌከ? የአድሐነተኩ እንዲ ኢኮን፡ ወሬዘ እት እንተ እግል ህዳይ መበል አግሉብ ሚ አሻረፍኩ። በይ! (ኢንጎት ትቤ ልቡለ ዕጎት) እለ ላቱ ኢንጎት ቱ፡ ኢንጌኩ። ምን ረአየት በልሸም እብ ገሌ ገብእ ሀዋፈተኩ። ሰራይ ሼክ በል ወመከይራይ (ሰርዳይ) ሐኪም በል ወመሳርያይ ጉልላት ቅርድ ለነቅል ወቀዋፈት ለቀንዋሽ፡ ዐድ ወከደን

ህኑን ሰሙኩ። ምንዲ ትቀሪዐም ወጎማትከ ምንዲ ተአሰሎም፡ ሰልፍ ውሐዝ ወግሩኩ። “ኬን በሉ ደዋዕ! ረሐቅ ለአምሴ በኑ ዎሮት ረኣሱ” መርገሙ ለኢትበጸሐከ ልብለካተ።

መዳግምዬ ልብ ካርያም እግሉ ገብእ ህሌክም? ሰልፍ እቅማተቹ፡ ገኖቦቹ ትፈሰሰት፡ ወልቤታዬ ቀርደ ወፈርሐ፡ ምን መትነዋናይ ወአንጠዋራር ምን ረአዩ ገብኡ፡ ፍጉረት መለኣክ መላእክት ክምሰልተ እባቱ አመርኮህ። ፍንጡር ወሽዕቱር ነብር ለነብረ ፍክርዬ፡ ወገሮብዬ አሕድ አግመለ። ዎሮት ገብኦ ሕሳብዬ ወወቀይዬመ እግሉ ሰደ። ሰድ ለፍጉረት ትትበራሽኦ ለውቀት ምን ዒማተ ዒረት፡ ወዶል ህተ ትነቅመ ሰኩን



እግል ክሉ ጀርብ” ወብዕድ እት ልብሉኒ ብዞሕ አሰባብ ወእግሉ ለመሰል ገመሚት ወምክር እግሉ አሰመዐውኒ።

አነ ላቱ እግል ናዮም በህል በክት ሃይብ ይዐልኩ። እዝን ጽምት ሃይቡ እት አነ የምዬ፡ የመ ሚልካይት ልብዬ ለእምበል ወድጃብ ተለው ለእቤለ ውተለው ለቴለተኒ እት ሻሬዕ እዲነ ሌግ ዐለ።

አይወ፡ ፍጉረት ለታምም ፍጉረ። ስኒ ንዱድ እት አነ ህዩ፡ ሪም ምን አዳም ወቅርቡ ምን አሕድ ትምክረህ እቹ። ምንዲ ተኣዝም ልጉም ወጽሙም ከኩኩ። ምንዲ ትትሃጌ እብ ሀላፍቱ ለሐሙኩ። ምንዲ ትረይም ውተኣዝም እብ

ወደ ለኮን፡ እላመ ረቢ አርኤኒተ ወአሰምዔኒ፡ ወጅህ ብዲሩ ምሰል ወጅህት ለትዋጅሁ።” ላኪን አሰናይ ልብዬ ለፈተየ እግል ረከብኮ እንዲ ኢኮን ሐቱመ ምሽክለት ይህሌት” እብሊ ህዩ እግል ህዳየ ምህሮቹ ሰደድኩ። በደል እት ኢምራጃ እትጀበር፡ እት ምራጃ ወሸንሂቹ እግል ክል አያዩ ጀበርኩ። አይወ! እተ ሻም ለፈጀኣት ሰኣል ከልቀቱ ቀሰብኩህም።

ዐጃመ ክምሰል ህተ ትብለ ለዐለት እበ ሐቱ ህደው እግልዬ እብ ስምዑቶም እት ፈርሐ። እብ እት እሲት ቀደምዬ ህዲት እት ትቀደሞ እግልዬ እት እብሎም ኢፈተወ

እግልዬ። እት ደንገበ ላኪን ለሕርያን ለአወላይ ሕርያንዬ ወሻምዬ ክምሰልቱ ሰበት አመረው እንዲ ኢፈቱ ትክበተወ ወአትድሐረወ እግልዬ። አይወ! ለሐቅ ስኒን ወድኒን ንቱል፡ ለምስጢሩ እንዲ ኢልትደሌ፡ ጣምሴሴ ልብል ለዐለ ደሚራዬ፡ አድሐ ጸዐደ ምን ሻሬዕ እዲነ እብ ክያሩ ወአረዩ ዔረ። እት ሰር አድሐ አልባብን እብ ሻማት ሕዋሌ ትፋጅኡ።

እብሊ ህዩ እንዲ ተሃዲነ እግለ ክልኣት ውሌዳመ ወምንዬመ ሐምስ እግሎም ወሰክነ እቶም። ሰላም ሕሽመት አሕድ ለውቀት ወፈርሐት ዒማቱ እም ዕያልዬ እት እንተ ጸንሐተኒ። አይወ! ስኒ አማንዬ ኢኮን ገብእ እለ። ህተ ጀህ በዐል ጼዋህ። ሕድርናት ወገጽ ፋሬሕ እግል ሴምያይ ዳርኩ። አነ ለእቤለ ህታመ “ወላሂ ህታተ” ትብል። ህተ እግልዬ ትሰሜ ወእብ “በዐል ዐድነ” ትከኔኒ። አነ እብ ስሜተ አትሳቅር ወእትፎፈል። ህተ እብ ስሜቹ ትትፋወሽ ወምን ልብዬ ሻም ወሬዘ ትትመወን። አናመ እግለ ቀደም ወቅተ እት ንኡሽ ዕምረ እት ህዳይ ቀሰብ እንዲ

ተጀበረት ለትደምዐ ልቤታየ እግሉ እዘንድ ወእተንትን እግለ ህሌኩ። ህተ እግልዬ ረኣይ ወሰመዕ ወክል ለገብኣት እት ሐያት ላትአትሐዜኒ ተ። አናመ ክምሰለ ናየ እግለ አነ። ያሬት ክል ምኒነ ምን ዶል ትውሊደትነ ሚልካይ ልብነ ምንዲ እንደሌ እንገብእ። እንዲ ማን ወገለብ እንዲ ኢነአትዋልዋ ክማም እት አድሕድ ወገበኣነ። ፍጉረት ምን ህዳይ ቀሰብ ወጀብር ወትነጃት ወአነ ምን መሀንን ወጣምሴስ ወሰለምኩ። ብዞሕ ወይህመምነ ወኢትሻቀልኩ። አናመ መዳግምዬ ክምሰለ ስምዐኩሙ ቱ። ሐቅ ብዞሕ ተዐብ ወጅርሰት ሚልካይ ሚልካይት ልብዬ ረከብኩ።

ምን ሀማት ወሸቀላት እብ ዕንቅራርዬ ሰከብኩ። ምን ሾሾሮት ወመትህናን ግልቹ በለስኩ። ምን ኬን ቦሉ አብ ፍላን ወፍላነት እት በህል ህሌኩ። መስጢር ልብዬ ህዩ እት እዲ ማን እም ዕያልዬ ጸንሐኒ። ላመ ሕቦዕ ምንዬ ለዐለ ምስጢር ልብዬ ህተ እት እንተ ጸንሐት። እብ መስጢር ልብዬ ሓክኒ!!! እት እብል ልብዬ መስጢሩ ኖሱ ረከበዩ እግልዬ።

ከነደ፡ መሀረጃን አርትርዩን እብ ነያረት ተ'መ

ናይ ሓል መሀረጃን ኤረትርዩን ሰካን ከነደ፡ እት ዮም 5 ወፅ ሰብተምበር እት መዲነት ቶሮንቶ እብ ነያረት ትሰርገለ።

ናይ ዮም ዓመት መጅረጃን እብ ናይ ሕሽመት ጋሻ ሰፊረት ደውለት ኤረትርዩ እት መዝመት መጅልስ ቅራን አሰይደ ሶፊያ ተስፋማርያም ቱ ለትከሰተ።

እተ መሀረጃን ምን ለትፈናተየ መዳይን ከነደ ወአምሪክ ለመጽአው ብዝሓም መዋጥኒን፡

ሚርሐት ደያናት ወመመቅረሐት ወጠንያይ ተጀሙዕ ክም ሻረከው፡ ምነ አካን ለበጽሐተነ ሐብሬ ተአፍህም።

ርኢስ መመቅረሓይት ልጅነት ዓያድ አሰይድ ተመስገን ትርፌ እተ እግለ አሰመዐ ከለመት፡ መሀረጃን እት መደቃብ ወሕደት ወረበዮት ወጠንያይ ወፋቅ ተረት ዐባይ ክምቡ እት ሽርሕ፡ መሻረከት ለወደው ወለሻረከው እግሎም ሐመደ።

ጋሽ-በርኩ፡ ርያድዩን አካናት ዐማር ልትዛዩሮ

እት አቅሊም ጋሽ-በርኩ፡ እብ ፈደሬሽን ኩረት ሾሊዐል እት ሀይተተ ገብእ ለአሰመነ ሻምፕዮን ለሻረከው ሽባብ ርያድዩን፡ እት ዮም 5 ሰብተምበር መአሰሳት ሰናዐት ትዛዩረው።

እሎም ዝያድ 300 ሻብ ወመመቅረሐቶም፡ እት እዳረት ደዋይሕ አለቡ ብኑይ ለህሌ፡ እት ሐንቱ መአሰሰት ዘርእ ወንዋይ ለልትመቃረሕ መርከዝ ፍጥር ወሰናዐት፡ መአሰሰት ሰናዐት ዜድ፡ ፋብሪካት ባናቶም፡ ፋብሪካት ሰፍነግ ውበዕድ እተ በጽሐው እቱ፡ እብ መመቅረሐት ሽቁል ወመኤምረት ሽቅልል መአሰሳት ለኸሰሰ ሐብሬ ተሀየበው።

ወኪል ከደማት ቴክኒክ ወመስኡል መሳንዕ ሌቴናል ኮሎኔል ተኪኤ

ወልዱ፡ እት አለቡ ለህለ መአሰሳት ወመሳንዕ፡ እት ለትፈናተ ድዋራት ለህለ በራምጅ ዐማር ለአደቅብ ወፈርያት ሐርስ እብ ነውዕዩቱ ወቅያሱ እግል ሊዚድ ሰዴ ክም ህለ ሸርሐ።

መመቅረሓይ ሽቁል መአሰሰት ሕዳደት አለቡ አሰይድ አማን ተኪኤ ወመሀንድስ ሃብቶም ተኸሊዝጊ እብ ተረቶም፡ እተ መአሰሳት ወፋብሪካት ሽባብ ተረት ዛይደት ለአገዱ ክም ህለው ወአርወሐቶም ጠውሮ ክም ህለው ሐበረው።

እት ደንገበ መሻርከት፡ አርዛቅ ስያሐት ናይለ ድዋር ለኸሰሰ ተውዴሕ እብ ፈርዕ ብሐሰ ወመታበዕት አርዛቅ አቅሊም ወወሕደት ዐማር እቅትሳድ ሙዲርየት ሀይተተ ተሀየበው።

ምዴርየት ሰንዐፌ መናበረት

ሰወር፦ ክብርም ጸሃዬ

እት ለሐልፊ ወሬሕ አስከ ምዴርየት ሰንዐፌ አቅሊም ግብለት እንዴ ተሐረክነ እትለ ሰነት እለ መናበረት ሸዑብ እግል አትሐየሶት ለትከደመ ወዲብ ካድም ለህለ አሽቃላት፡ ከምሰልሁመ መአሰሳት ከደማት እጅትማዕየት ካልቀ ለህለ ረህየት እግል ልወዴሕ እግልነ ሙዲር ምዴርየት ሰንዐፌ አለይድ እድሪሰ ዐለ ሸከር ምሰሉ ሃድጋም ዐልነ። ታምም ጽብጥ ህድግነ ህዩ ዲብ ክልኤ እንዴ ከፊልነ እግል ንቀድሙ እግልኩም ቲ። እግልዮም አወላይ ክፋል። ቅሪ-ኣት በኪተት።



አሰይድ እድሪስ ዓሊ ሸከር

ምዲርየት ሰንዐፌ ሐቲ ምን 12 ምዲርዮት አቅሊም ግብለት ተ። ዲብ ሕዱድ ናይ ኦቶብዩ ለህለ ግብለታይ ምፍጋር ጸሓይ እንርክ ናይለ አቅሊም ህዩ ትትረከብ፡ ርሕብክ ናይ እለ ምዲርየት እብ ደረጀት አቅሊም ዶል ልትርኤ ህዩ ካልኣይ ደረጀት ጸብዋ። ለእንክር ምፍካር ጸሓይ ለህለ ሐሲዮት ህዩ ሰኒ ርሒብቲ። ለልትሐረሰ ኦርድ ሐድ 16 አልፍ ሄክታር በጽሕ። ሓለት ጀው ሰኒ ሰበት ቡ ህዩ ለሀብካህ ዘርእ ለትትከበት ኦርደት ተ። መትወቃለ ለበበ ደብር እምበሶይረ ለትመልክ ሰበትት ምን ጠፋሓት በሐር ዝያድ 3700 ለበጽሕ ቲ። ለበዝሐ ሸዕበ እብ ሐርብ፡ ርዕዮ፡ ትጃረት ወአሽቃል የውምየት ቲ ለልትናበር። ክልኤ ቀውምየት ትግርኘ ወሳሆ ህዩ እብ ሕበር ወውፋቅ ነብራህ። ሓለት ዝላም ዲብ ክል ሰነት እብ ተቀይም አስክ 550 ሚሊ መትር በጽሕ። ዮም ዓመት ላኪን 100 ሚሊ መትርመ እግል ትርኩብ ኢቀድረትኒ። ሰበት እለ ናይ ዮም ዓመት ኢረኪብ ዝላም ሱዱፋ ህለ።

ምዳርየት ሰንዐፌ 26 እዳረት ደዋሐ ዲበን ለልትከምከመ 118 ዐዶታት፡ ሐቲ መዲነት ሰንዐፌ ወሐቲ ሹቡህ መዲነት ሰርሐ ህለዩ ዲበ። ዝያድ 70 አልፍ ሽዑብ ህዩ ነብረ። እትለ ሰነት እለ ለትከደመ አሽቃላት እብ ደረጀት ወጠን እብ ዐባዩ መአሰሳት ክም መአሰሰት ሰገን፡ አሰቤት፡ መአሰሰት ካህረበት ውበዕዳት ብዙሐ አሽቃላት ቱ ትከደመ ወልትከደም ለህለ። እግልማእ እለ መንጠቀት እለ መደት ርቦ ዘመን ናይ ሐርብ መንጠቀትተ ለዐለት፡ እብ ሰብብ ሐርብ ህዩ ደመረት ወሸዕበ ትሻዕተረ ምን ዐዶታቱ አሰክ መዳደን ገዕዘ። ለወክዱ ሰዱድ ሰበት ዐለ ሽዑብ ዲበ ጀብህት እንዴ ገብአ

መጦር ዴሹ እንዴ በጥረ ቱ
 ጋብህ ለዐለ። እትለ መደት ሰላም
 ሆይ ብዙሐ መሻርዕ ልትብኔ እግሉ
 ህለ። ለዎሮ ምኑ ናይ ጽርግያቱ፤
 እለ ጸላም ጽርግዩ ክም የዐለት
 ተ ጋብአት ዐለት። እብ ፍንቱይ
 ምን ዐዲ ቀይሕ አስከ ሰርሐ ለህለ
 መሻክል ዐለ። አዜ እብ መአሰሰት
 አሰቤት ግሩም እንዴ ገብአ አስከ
 ደዋሐ. ፎርቶ ገጽሐት ህሌት።
 ሰበት እለ. እብ ዐመል ተቅይር
 አምጽአት እግልነ። አተቡሳት
 ዲብ እለ. ባኮት እግል ልትሐረክ
 ክቡድ ለዐለ። ከምሰልሁመ ነኣይሽ
 ማይን እንዴ ኢተርፈ. ዲብ እለ.
 ግል ልምጽኦ ቀድረ ለኢዐለየ ገበይ
 ብት ሰኔት። እግል ልምጽኦ አሰብደየ
 ለ ሐረከት ሰኔት። ሰበት እለ. ዲብ
 ይ መዋሰላት ለዐለ መሻክል ሐል
 ክብ።

ካልኣይ ናይ ካህረበት ቲ፡ እለ ምዴርየት እለ እብ ጀነሬተር ምስል ዐዲ ቀይሕ እብ ሕበር ተኣስተፊድ ጸንሐት። ለነፊተራት ሐዳይስ እንዴ ህለየ ግሩም ሸቀዩ። ዲብ እሊ ኣክር ወክድ ላኪን እንዴ ልድፅፊ ሰበት ጌሰየ ወለከርባሁ ሰበት በዝሐት፡ ክድመት ካህረበት እግል ለሀበ እቲ ለኢቀድረ ክም በጽሐየ እሊ ከዋ እሊ ኣሰብድ። እሊ ከዋ እሊ ህዩ ዲብ ሰንዐፊ እንዴ በጽሐ፡ ኣሰክ ሰርሐ ኣተላለ ክህለ። ሰኒ ጃንብ ናዩ ህዩ ብዝሓት ዐዶታት ዲብ ከይድ ለሐልፍ ሰበት ህለ ዝያድ 20 ዐዶታት ምን እሊ መሸርፅ እሊ በክት እግል ልርከባቲ። ለተርፊየ ህዩ ዲብ ቅሩብን በጽሕ ሰበት ህለ እግል ልርከባቡ ለቀድረ ሰኣየት ህሉት። ብዕድ ለዐለ መሻክል ናይ ባንኪቲ፡ ዲብ እለ መንጠቀት ባንኪ ሰበት ኢዐለ ሽዑብ ከደማት ባንኪ እግል ልርከብ ኣሰክ ዐዲ ቀይሕ ገይሰ ወናይ መዋሰላት ወሰፈርያት መሻክል ለሓልፍ ዐለ። እትሊ ወክድ እሊ ላኪን ባንኪ ትጃረት ወእብያት መብክ እግል ልብኔ እንበት ህለ። ሸቅል ናይለ መብክ ህዩ ዝያድ 80



ምእታይት ዲብ ተሚም ባጽሕ ህለ።
ከምሰልሁመ ናይ ኤሪቴል ሙብነ
ዝያድ 90 ምእታይ ዲብ ተሚም
ህለ።

ምዳርየት ሰንዐፊ ዲብ እለ ሰነት እለ ናይ ተዕሊም ከደማት እግል ኣርሐቦትመ ዝያድ እብ ተርኪዝ ልትሸቄ እቲ ለህለ ናይ ረውዳት መዳርሰቲ። እሊ ዲብ ክለን ዐዶታት ወዲበ ረዩም ሐሲያት ምስል ኣቅሊም ቅብለት በሐር ቀየሕ ለልኣትራክብ እንዴ ኢተርፍ ዐደድ ደረሰ ለበጽሐ ምን በጽሕ ክም ልትከሰት ጋብእ ህለ፡ ለተርፈመ ዮም ዓመት እግል ልትከሰት ሕሰብ ህለ። ታርፍ ለህለ በቃዐቱ ኣከዶቲ። እብ ሙደርሲን ወመባኒ እግል ኣተረዶቲ በርናምጅ ፋግር ህለ። ከኣፎ እንዴ ወዴክ መባኒ ትብኔ ህዩ ዎሮ ምን ክም በርናምጅ ህዩብ ለህለ ወልትክደም እቲ ለህለ ቲ። ሰበት እሊ ዕሙማይ ዲብ ተዕሊም ለህለ እሉም መትመዳድ ለልኣተግንዕ ቲ። ዲብ ዓፍየትመ እብ ኣሳሰ ሲያሰት ውዛረት ዓፍየት ሰኒ መትመዳድ መኣሰሳት ዓፍየትቱ ለህለ እግሉም። እምበል እሊ ብጹሕ ለህለ ናይ ልጃን ዕሬ ለክሰስ ቲ።



ሸዑብ ዲብ እሊ ወክድ እሊ ቅደዩ ምን ቅሩብ ኖሱ እብ ኖሱ ክም ለአሰክብ ጋብእ ህለ። እሊ ህዩ ክም ተጃርብ ሐዲስ ለልትርኤ ምንግቱ ዲብ ሙስተቅበል ላኪን ራህየት እግል ለአምጽእ ለቀድር ክም ቱ ሰእየት ገብእ እቲ።

እትላ ሰነት እላ ለልትከደም
በርናምጅ ብዙሕ እብ ፍንቱይ
ለልትርኤ ህዩ መሸርፅ ሐሲያት
ምፍጋር ጸሓይ ለልትሰማቲ። እሊ
ዲብ ሐሲያት ለነብር ሸዑብ ዲብ
መናበረቱ እግል ልሲደዩ ለቀድር
ሐርሰ ለላትጋይሰ እቱ ጣፍሕ
ኦርድ ሰበት አለቡ፡ ምስል ሕፍዘት



ማይ ወትርበት ወአፍረዮት ንህብ ለልትጸበጥ ብዙሕ ካድም ጋብእ ህለ። ምን እለ ወሐርመ ለመሸርቦ ረይምቱ አሰክ ሐምሰ ሰነት ለጉበእ

እግል ለአተላላቱ። የም ዓመት ሌብ ዲብ ሰለሰ እዳረት ደዋሒ ሐሰያት እምባሰይረ ለልትበህለ ዝያድ 7 ሚልዮን ነቅፈ ተካሊፍ ፋግር ህለ፤ ዲብ ሕፍዘት ማይ ወትርበት። እተ ትመጽእ ህዬ ዲብ ናይ ካዘናት ወረህያታት ሸቅል እግል ልትዐዴ ተ። ምስል እሊ ተዋብ ንህብ ወንዋይ መ መዋመጦሩ ለገይሱቱ። የም ዓመት እብ ፍንቱይ እንዴ ረከዘው ለከድመው እቱ ላኪን ናይ ሕፍዘት ማይ ወትርበት ካድም ተ። እሊ መናበረት ናይ ሸዑብ እግል ኣድመኖቱ ዝያድ እንዴ ረከዘው ለቀንጸው እቡ ተ። እሊ ለደዋሒ ዲብ እግመሎት ወዲብ መብተቅበል ነፍሰከ ናይ ቅድረት ሐዞት ዓባዩ ለቡቱ።

እትለ ሰነት እለ ምኒ ሐዲስ ቀደም
አዜ ለኢዐለ እግል ሙዋጥኒን ክም
ናይ ሰከን ወሐርስ ለመስል ተውዚዕ
አርድ እግል ቃባት ለጉበእ ናይ
ኖሱ ሕዝባት እግል ሊዪ ለትህየበ
አርድቲ። እሊ ህዪ ለዐድ እንዴ
ኣተፈገት እግል ዓኢላት ዲብ ደብር
እግል ልግባእ ቀድር ወመሓዛት እብ

ውፋቅ ናይ ኦርድ ሕዝባት እግል አፍራድ ልትሆብ። ለሙዋጥን ኦርድት ለትሆብቱ ህይ እግለ ኦርድቱ እንዴ ከድመ ዲብ ሒን ከረም ሽትል ልትሆብ ወእግል ብዙሕ ሰኒን እግል ልትነፋሶ እቡ ለቀድር ዕጩይ ክም ምልክቶቱ ሽትል። ደግሞ ዲብ 10 እዳራት ደዋሒ አንበተ የም ዓመት ህይ ለተርፈየ እምበል ሑዳት እብ ገሌ አሰባብ እግል ሊያየ ሊኢቀድረየ፡ ለመሸርዕ ዲብ ክሉ እሰብዱይ ህለ። ከረም ኢሰኔት እግሉ እንዲኢኮን ነቲጀት ሰኔት ወአምጽኦ ዐለ። ለሐልፈሊ ላኪን አሰክ ሰር ሚልዮን ለገብእ ሽትል እግል እሊ ናይ አፍራድ ሕዝባት ሰበት ዳለ፡ ዲብ ቃባት ወመአሰሳት እንዴ ትሽተለ ነቲጀት ሰኔት እምጽኦ ዐለ። ዝያድ ነቲጀት ለትርኡት እቱ ህይ ለእብ አፍራድ ለትሽተላ ተ፡ እግልሚ ምን ቅርብ ኖሶም ሰበት ራዕወ። እሊ ግያሰ እሊ በዲር እብ ደረጀት ዐድ ገብእ ለዐለ ተ። ለዐድ እብ ሕበር ምን ለሸትለቱ ወኣብቀለቱ ዕጩየ እብ ሕበር ትትነፋሶ ዐለት። አኪ ናይ አፍራድ ውሰክ እቱ ህለ። ህቱ ህይ ምልክቶት ናይለ ባዕሉቱ፡ ክመ እግል ዘርኦ እግል ልትነፋሶ ምኑ ቀድር እብ ኣሳሰ መምርሕ በዐል መዝ ቃባት ወንዋይ ከደን። ሰበት እሊ ዲብ ምዴርየት ሰንዐፊ ሐቱ ምን ዐቢ ተቅይር ለትረኦ እተን ሰየታት ተን እለ ሰነት የም ዓመት፡ እብ ኣሳሰ ተውዴሕ ኣሰይድ እድረሰ ዐለ ሸከር ሙዲር ምዴርየት ሰንዐፊ።



እብ ውዛረት ተዕሊም እት ክል-ክልኤ ሳምን ሉትዳሌ



ሄለል ሰብተምበር፡ እስተንቡረት ንዓል ሐቅ ወወድል

2ይ ክፍል

መሳዋት እብ

መሻረከት እት ሸቅል

ጀብህት ሸብብየት ዲብ ሐቅ ወመሳዋት አንሳት መውቀፈ ባይን፡ ፈጻልየት በርናመጀ ወመካይድ ስያሰተ ዕሉት ቱ። ለቀዳምያት መናድላት በያን እብ ዐመል ቅድረተን ሰበት አርአየ ሀዬ፡ ከብቴ አንሳት እግል ትርኩብ ሰበት አተቅደረዬ፡ ሐቅ ዲብ 1977-78 ለወዴቱ አወላይ መ-እተመረ ዕልብ መናድላት እብ ዕጹፋት እንዴ ዜደ 30% በጽሐ።


ዲብ ክሉ አቅሳም ወዴሽ መጦር ውላድ ተብዕን ሰፈን እንዴ ጸብጠየ ሰውረተን አደቀበዬ። ምን ለትፈናተ ክፈፍል መ-ጅተመዕ፡ አስክለ ምንለ ርኡይ ጨቅዋ ተብዕት ወዳዳት ለዐለ ዲብ ብሩር ዐድነ ዲብ ንዓል ክፈሕ መሰለሕ ሻረኩተን ሀዬ፡ ዲብ ቀድየት መሳዋት መትቀዳም ዐቢ ዐለ።

መብደእ ስያሰት ጀብህት ሸብብየት ክቱብ ወስቅራታት ሌጠ እንዴ ኢጉብኤ፡ እብ ዐመል ወሸቅል ለለአምን ምን ገብኤ፡ እግል መናድላት፡ ዲብ ክሉ መጃላት ናይለ ንዓል፡ ዲብ ለትፈናተ ርትባት፡ አስክ ዲብ ዴሽ ሐርብ መጦር ውላድ ተብዕን ክም ልትመዘዘ ወዴት፡ እብሊ ሀዬ መቅደረተን ወበቃዐተን ለለርእየ ዲብ አርድየት ወሰርዐት ክልቀት እለን። ህተንመ “መሳዋት እብ መሻረከት ዲብ ሸቅል” እንዴ አስቀረዩ፡ በቃዐተን ወሐጠረን እብ ዐመል አርአየ። ወጠንየተን፡ መትሰባለን ወእምነተን ሀዬ፡ ረታዐት ስያሰት ጀብህት ሸብብየት ዲብ አከዶት ወአተረዶት ዶር ዐቢ አግደ። ረከይ ውላድ ተብዕን ምንለ “ጸር እግል ልግበእ እትናቴ፡ ዲብ አንሳይት ለአለቡ ሐርብ ኢልትዐወት” በደለዎህ። እምበል ሸክ፡ እት ሚዳን ሐርብ ለትረኤት ፈራሰት አንሳት ዲብ ዐለም ለልትሳነ ምን ለሀሌ ሐድ ቱ። ዲብ ብዕድመ፡ አስክለ ሰኒ ክቡድ ወለለአትሀልክ ነሐር አዳም ለለሐዜ አሸቃል ጋራጃት ወብዣት ተሕትየት እንዴ ሻረከየ በቃዐተን እብ ዐመል አርአየ።

መሻረከት አዋልድ አንሳት ዲብላ ትፈናተ ውሕዳት ጀብህት ሸብብየት (1989)

Table with 2 columns: ጅንሰ ሸቅል (Category) and መሻረከት አንሳት እብ ምእታይት (Percentage). Rows include ዲብ ዴሽ ሐርብ (23.0), መሳኔዕ (29.5), መዋሰላት (22.5), ዓፍየት (55.2), ብነእ (19.6), ሐርስ (19.8), ኤለክትሮኒክስ (25.0), እርሻድ አልቆሚ (1.7), ማልየት (9.5), እትሳላት (33.1).

ዲማት፡ መሕበር ወጠን አዋልድ አንሳት ኤረትርየ ክርን ኤረትርየን አንሳት፡ 1989



መናድላት ዲብ ቴክኒክ

እሊ ዓላብ እሊ፡ ለዲብ ንዓል ለዐለት ኤረትርየ፡ መስክለት መሳዋት አንሳት ክም ቀድየት አሳሰየት እንዴ አምነት እበ ክም ሸቄት፡ ምን አንሳት እተ ከሰሰ እድንያይ እትፋቅያት ለፈርመየ ውበዞሕ ለቤለየ ድወል መ-ስተቅላት ወለዐል እብ ዐመል ክም አከደቱ ለአሸር። እት ሐርብ ወክሉ ወራታት ለዐት ዋቅየት መሻረከት



አንሳት ኤረትርየ፡ ሐቱ ምን ንዓል ለዐወተያተ።

እበ ትከልቀት እለን አርድየት ንዓል፡ ብዝሓት ሐጽር ዓዳት ወአድያን እንዴ ተዐደየ ሰለሕ ረፍዐየ፡ እብ ስያሰት ፈዝዐየ፡ ምህናት መልከየ፡ ዲብ ዴሽ ልግበእ ወሀይኢት ጀብህት ሸብብየት ዲብላ ክም መስክላት እንዴ ትየመመየ ናድለየ፡ ለበዘሐ ሀዬ፡ ዲብ ሕሩር አራዲ፡ ዲብ ሐንቴ አባይ ለዐለ ብሩር ወመዳይን፡ ዲብ ልጃኤ፡ መነዘማት ጀማሂር እንዴ ገአየ፡ ዓጸት ሰውረተን ሓጠጠየ። ዲብ ቀበት አባይ፡ ዲብ ሐንቴ ሰኒ ሰድት ወናይ ተሐዲ ሓለት፡ ሐጠር፡ መትሰባል ወሰባት ለለሐዜ ናይ ምስጢር ወራታት ዲብ ሸቅየ ለአስተሸህደየ ወአረይ ዐዛብ ሰጅን ለገብአየ አንሳት ሰኒ ብዝሓት ተን።

መትነዛም

አዋልድ አንሳት

ጀብህት ሸብብየት ድቁብ ተሓድያት ዲን ወዓዳት እንዴ ጋበህት ለተደሚዕ ወፈጻሊየት መሻረከት አንሳት እግል ተአክድ ለቀድረት፡ ዲብ ቀድየት ሐቅ ወመሳዋት አንሳት ለኢልትህንዘዝ መብደእ ወፈዛዐት ስያሰት ምን ዐለት እላ ቱ። ዲብላ መርሐለት ሰልፍ፡ ለመሻረከት እግል ትትዓቀል ለዐለ መቃወማት ቀሊል ይዐለ። ዲብ እጅትማዓት እግል ኢልሻርኩ “ወለት አንሰ ምን ቤት እግል ትፋገር፡ መጦር ወድ-ተብዕት እንዴ በዋረት እግል ትትሃጌ፡ ዓዳትነ ወዲን ኢሰምሕ” ዲብ ልብሉ ለልትጣጦር ሐዳም ይዐለው። ምስል ክሉ ለመቃወማት ላኪን፡ አንሳት ናይ ዝዞምት ወአፍዝየት ሀደፈ እንዴ ሐጠጠት እብ ፋይሕ አተላሌት። ፈዛዐት ወመሻረከት አንሳት እት ለዐቤ አክለ ጌሰ ሀዬ፡ እብ ውሕዳት ወሐሽምት ዲብ ልትነምነመ፡ ምንቀብተን ከዋድር እት ልትረበየ፡ እብ ደረጀት ደገጊት፡ መሓፈዛት፡ መ-ዴርያት መሓብር አንሳት (ማሕበር አዋልድ አንሳት ኤረትርየ) ክም ከውነ ገብኤ።

እብሊ መትነዛም እሊ እብ ብዝሐ ከዋድር ክም ፈረየ፡ ኤረትርየት አንሳት፡ እብ ደረጀት ወጠን ለከምክመን ወጠንያይ መሕበር አትሐዘየን። እብሊ ሀዬ ዲብ ተእሲስ መሕበር ወጠን አዋልድ አንሳት ኤረትርየ ለመርሐ ተጠውራት ትረኤ። ክምለ ቀደም እለ ለተሀደገ፡ ንዓል አንሳት ኤረትርየ እስትቅላል ወጠን ወሸረፍ እንሳኒ ቀደም መትአሳስ መሕበር ወጠን አዋልድ አንሳት ኤረትርየ ምንመ አንበተ፡ መትአሳስ ማሕበር ሀዬ ኤረትርየት ዲብ ዕዛል ዎሮት ወጠንያይ መሕበር እንዴ ትነምነመየ እግል እስትቅላል ወጠን ልግበእ ወሐቅ ወሸረፍ አንሳይት እብላ ትደቀበ ወለትነዝመ አግቡይ እግል ልናድለ አርድየት እግል ትዋፈሕ ምህም ምዕራፍ ዐለ።

እግል ተእሪክ መትአሳስ ወጠንያይ መሕበር አንሳት እንዴ ሀረሰኒ ዲብ ንትሃጌ፡ ቀደምለ እብ ጀብህት ሸብብየት ለትነሰአት መባደረት፡ እብ ደረጀት ወጠን መሕበር አንሳት እግል አሰሰት እብ ጀብህት ተሕሪር ኤረትርየ ለትነሰአት መባደረት ክም ዐለት እግል ልትዘከር ምህምተ። ጀብህት ተሕሪር ኤረትርየ ዲብላ እት ሰነት 1971 ለወዴቱ አወላይ መ-እተመር ወጠኒ፡ አሰሰት መነዘማት ገቢል ዲብ ቀራራተ ካትብቴ ዐለት። እብ አሳስ እሊ ዲብ ሰነት 1974፡ ዓም መሕበር ኤረትርየት አንሳት ክም ተአሰሰ አወጀት። ጀብህት ተሕሪር ኤረትርየ፡ ምንለ መደት ለህ እንዴ አንበተት እዉጅ መሕበር አንሳት ምንመ ዐለ እግሉ፡ ዲብ ቀበትለ ተንዝም ለዐለ መትነዛፋል ስያሰት ወለዘይድ እብ ሰበብለ ዲብላ ተንዝም ዓምም ለዐለ ቤልሳይ ሐር ሐሽም ለመሕበር ክምለ ልትሐዜ እግል ልትጠወር ኢቀድረ። ሚርሐት ጀብህት ተሕሪር ኤረትርየ እግል መሻረከት አንሳት ዲብ ንዓል ክፈሕ መሰለሕ ዲብ በርናምጀ



መናድላት ዲብ ዳወየት ገቢል


ምንመ አየደቱ፡ ለተንዝም እብ አሳሰያይ መሻክል ስያሰት ልትዐዘብ ወአሰክ ልትፈንጠር ምን አዝመት ዲብ አዝመት ሰበት ተኸለ፡ ክም ክሉ ብዕድ፡ መሻረከት አንሳት ዲብ ጀብህት ተሕሪር ክምለ ልትሐዜ ኢትጠወረት።

“ ገቢል ልፍዘዕ፡ ልትነዝም ወልትሰለሕ” እበ ልብል ሀደፍ ጀብህት ሸብብየት እብ ፋይሐት ተአገድዩ ለዐለት ዳይ ዝዞምት ገቢል እብ ፍንቱይ ሀዬ አዋልድ አንሳት ዲብ ቀበት ዐድ ሌጠ ለትወጀህ ይዐለ። ጀብህት ሸብብየት እግል እብ ልጃኤ ዲብላ ትፈናተየ ድወል ፍንጡራት ለዐለየ አንሳት ዲብ ዝዞምትመ እብ መዕጸም ተሐረከት። ምንለ አንሳት ዐባይ ቅቡልየት ወሰዳይት ሰበት ረክበት ሀዬ፡ ዲብላ ትፈናተየ ድወል ካርጅ ምንለ ተአሰሰ መትነዛም ገቢል፡ ለትደቀበ ወአግደ መትነዛም አንሳት ቱ ለዐለ። ለሐር መሕበር ወጠን አዋልድ አንሳት ኤረትርየ ለከወነ መትነዛም ሀዬ፡ እግል ዲብ ቀበት ዐድ፡ እብ ገበይ እዳረት ሸብብ(ጀማሂር)፡ እብ ውሕደት- ሐሽም- ዐድ- መሕፈዘት- ምዴርየት ልትነዝም ለዐለ መትነዛምነም፡ ዲብ ካርጅ ሀዬ እብ ደውለት-ደውለቱ ልትከወን ለዐለ መሓብርቱ። ዲብ ቅብለት አሚከሪክ እግል መሰል፡ ለመትነዛም ምን መዳይን እንዴ ሐልፈ እብ ደረጀትለ ደውለት ፈይሐ። ዲብ 1977 መሕበር ኤረትርየት አንሳት ቅብለት አሚከሪክ እሰሰ ክም ዐለ ልትአመር። ዲብ 1978፡ ዲብ 12 ደውለት አርብ ለዐለየ አንሳት ለከምክም መሕበር ልትአሰሰ እትሀለ፡ ዲብ ድወል ምግባይ ምፍጋር ጸሓይ ወአፍራቃመ እሊ ለመሰል ፍይሕ ለቤለ መሓብር አንሳት እግል ልትከወን ቃድር ዐለ። እሊ ተጠውራት እሊቱ ሀዬ ለዲብ ተእሲስ ዎሮት ወጠንያይ መሕበር ለአሸከተ።

እት 1978 ኤረትርየት አንሳት ዲብ ዐድ ወካርጅ መሕበር ወጠኒ እግል ለአሰሰ፡ መ-እተመር ወጠኒ እግል ሊደየ ልትዳለየ ዲብ ሀለየ፡ እብ ሰብብ መትአታይ እተሓድ ሶሼት ሚዛን ዐስከርየት እንዴ ትበደለት፡ ሰውረት ኤረትርየ ዲብ መርሐለት ስትራቴጂያይ እንሰሓብ ሰበት አቴት፡ ምስለ ዐለ ሕፋን ቴለል ዐስከሪ ወድጌ ሰውረት ናይ አሰሰት ንዓል እት ዐመል እግል ልውዐል ኢቀድረ። ዴሽ ጀብህት ሸብብየት፡ ምን ክሉ ለእሉ ጸብጦ ዐለ ባኮት ኤረትርየ እንዴ አንሰሐበ ዲብ ሳከል ድጌ ሕጡጥ እንዴ አድመነ

አተላላይ ሰውረት እንዴ አተብተ፡ ዲብ 1979 ምን ቀበት ዐድ ወካርጅ ለመጽአየ፡ ወካይል መሓብር አንሳት፡ ዲብ ድጌ ሰውረት ናይ ጀብህት ሸብብየት ሳከል በህለት ዲብ አራግ አወላይ ወአሳሲ መ-እተመረን እንዴ ወደየ መሕበር ወጠን አዋልድ አንሳት ኤረትርየ-መ.ወ.አ.አ.ኤ አሰሰየ።

ልእክአት መሕበር ወጠን አንሳት ኤረትርየ፡ እግል አንሳት ዲብላ ድድ እቅጣዕየት፡ እምበራጦርየት ወናይ ከርስ ቤልሰት ሐር እብ ሚርሐት ጀብህት ሸብብ ተሕሪር ኤረትርየ ትጉብእ ለዐለት ወጠንያይት ደሞቅራዊያይት ሰውረት፡ እብላ ትወቀለት እግል



መናድላት ምስል መልህያመ ገጸ ባርህ

ልሻርክ አፍዝየት፡ ዝዞምት ወሰልሐት፡ ድድለ ዲብ መ-ጅተመዕ ኤረትርየ ዓምም ለዐለ አፍካር አበወየት ወድንጉር ዓዳት እንዴ ናደለየ ሕርየት ወመሳዋት አንሳት እብ ዐመል አሴራር፡ እግል አንሳት ለከሰሰ እቅትሳድያይ ወመሕበራይ ወቃትንያይ መሻክል ሐል ባሰርት ክምስልሁ መ ንዓል አንሳት ኤረትርየ ምስል ንዓል አንሳት ዐለም አትአመርት ወአትጸበጦት ለልብል ዐለ።

እሊ መሕበር እሊ ክም ነቲጀት ፈዛዐት ወመትነዛም ኤረትርየት አንሳት ወፈጻልየት መሻረከተን ዲብ ሰውረት፡ ዲብ ከርስ ጀብህት ሸብብየት ለትወለድ፡ አዋልድ አንሳት ኤረትርየ ዲብ ረዩም ናይ ንዓል ታሪክን እግል ልክለቃሁ ለቀድረየ ለዐበ መትነዛምተ። ዲብ ንዓል ጀላብ እስትቅላል ወጠን ልግበእ ወሐቅ ወመሳዋት አንሳት እግል አከዶት እተ ገብእ ጅህድ ለአግደየ ዶር ሀዬ ቀሊል ይዐለ።



አሰይድ ዐብደሰ መሐመድ ኣብኒ ልትበህል። እት ሰነት 1964 እት ኣቋርደት ትወለደ ወዲበ ዐበ። ሐያቱ ኩሉ ምን ኣቋርደት ለይኦሪ መድ ሐረስታይ ቱ። ምን መደት ንእሹ ኣሰክ ሃድል-ዮም ምን ሐርስ በታተን ይኣራመ። “እት ደምዬ ለትሓበረት ፍቲ ሐርስ ብዬ። ክመ እፍህመ፡ ሐርስ ውርስ ቱ እብል። ዋልዲን እት ሐርስ ወርዕዮ ሕሰር ውቁል ሰበት ዐለ እሎም፡ ኣናመ እብ ሐርስ እግል እትናበር ደርዮም ጸብዋ ህሌኮ” ልብል። ከዓመድ ፍሬ-ካድም ዮም ምስል እሊ በሰርታይ ሐረስታይ እብ መብራህቶም ገብረሂወት ለገኣት መቃበለት እዱሉይ እኩም ህሉ፡ ከእለ ተ’ሌ ተ፡

ሰኣል፡ ዕለያትክ ዲብ ሐርስ ሚ ሰዳተኹ

በሊሴ፡ ኣግደ ፍቲ ሸቅል ክም ተህሊ እዬ ወዲተኒ። ክምስልሁመ እት ሐርስ ፍቲ ዛይደት ኣሰበቀት እቲ እግል ኣብል እቀድር። ኣሳሰ ኣጽበጠተኒ ወተጃርብ ሐርስ ሀበተኒ። ሰነት ሰብ ክም ገኣኩ፡ ነፍሼ እግል እቅደር እት ሰነት 1984፡ ጽምድ ኣብዕረት እንዴ ተወብኩ፡ ሐርስ ክም ምህንቲ ኣቲት እቲ። ኖሼ ለሸቁክዉ ኣላት ሐርስ እንዴ ነሰኣኩ፡ ገርህዬ ሰኒ እንዴ መዳመድት ብሰር ርሽድ ትርበት እት እጠውር ሄረርኩ።

ክም ነቲጀቱ ህዬ፡ ቀደም እለ እት ባካትን ለኢትረክበ እተይ ምን እክል እግል ኣቲ ቀደርኩ። ዘርእ ወጃብ ዐለ እዬ። ምንዬ ዘርእ ለነሰኣ መልህያም ሐረስቶት መወዳኩ። ሐቆ እሊ ግድም፡ መጦርሊ ሐርስ ከረም፡ ሐርስ መሰኖ እግል እጠውር ብዬ ለትብል ፍክረት ሀረሰኩ፡ ከዲብ ሰነት 2003 ሸቅል ጃርዲን እቲ ኣሌፍ እበ። እሊ ቱ ህዬ ኣሸቃል ጃርዲን ሰኒ ለእፈትዮ ወእትረዮሕ እሉ ሸቅልዬ እንዴ ገኡ፡ 23 ሰነት ዋዲ ዲቡ ህሌኩ።

ሰኣል፡ ኣዜ ሚ ትዘርእ ህሌክ?

በሊሴ፡ እሰልፍ ዝያድ ሰለሰ ኣልፍ ዕጩት በናን እበን ገማል ኣንበትኩ። ምናተ ለበናን እግል ልብቀል ወፍሬ ለሀበኒ ኢቀድረ። ሐቆህ ለይሙን እት ምድር ርሒብ ዘርኣኮ ወሰኒ ፈረ እግልዬ። ሰኒ ለትሐሰርኮ ዲበ ዐማር ሐምሌ እት ገብኤ፡ ከመዶረ፡ በሰል፡ ጎዕ-በርበሬ፡ ኣሰወድ፡ ድባ፡ ብርጫቅ፡ ባምየት ውብዕድ ኣፈሬ ህሌኩ። ኣዜ ምስል ጸዋዬ እት ኣትሳናይ ምድር፡ ኣሸፈርቱ፡ ሸዒጉ ወመዳማዱ ጽመድ ህሌኩ። ምን 13 ሄክታር ለገብኤ ምድር



ጃርዲንዬ፡ ለሰለሰ ሄክታር ሎቢን፡ ለ10 ሄክታር ህዬ ገማል ሐምሌ ዋዲሁ ህሌኩ። እብ ውብረት ሐርስ ለትህየቤኒ ዘርእ ወጃብ ወናይ ንዋይ ዐለፍ ኣክደርመ እብ መሰኖ ዲብ ኣሰቲ ኣገምል ህሌኩ። ምን ዘርእ ዕፋን ወጃብ እተይ ሰኒ ረከብኩ፡ ኣክደር ዐለፍ ንዋይመ ዲብ ርሽድ ተዋብዬ ሰኒ ኔፍዓይ ራክቡ ህሌኩ።

ሰኣል፡ እትሊ ግረህክ ሚ ኣብሳር ትትነፈፅ?

በሊሴ፡ ኣትሳናይ ገርህት ወኣረሻድ ትርበት ለሰልፋይ ወቀይ እረትብ። እብ ተረክተር ሐርሴ፡ ኣትሐዘ ምን ገብኤ ህዬ ዱሉይ መርያት ኣብዕረት ሰበት ብዬ፡ እብ



ኣብዕረትመ ሐርሴ፡ ሸፍር ንዋይ ወትምፖስት እቡ ኣሸፍር። ወክድ ዘርእ ወሸቲል እብ ዋጅብ ዐቅቡ። እበ ለትኣትሐዜ እዳረት ገርህት ክም ግልገል፡ ወርከዮት ሀረሞ፡ ኣሰረቶት ባልዲን ወሕማማት ብቅል ለመሰል ኣሸቃል እወዴ። ማይመ እብ ትግበር እሸቁቡ ከዲብ መዓሉ ኣውዕሉ። እት ሸቅልዬ ክል-ዶል እግል ኣሰፊ እክድም። ውብረት ሐርስ ብሐሰ እት ወዴ፡ ‘ደማን ቅዘ ለበ

ሚህዛይ ወበሰርታይ ሐረስታይ

መኅት እግል ኩሉ ወእት ኩሉ’ እበ ልብል ህደፍ ለኣትበገሰቱ መሸርዕመ እትጸገም እቲ ህሌኩ። መንገፍ ነብራመ ምን ገርህት ኣሰክ ንትዐገል ዲበ ክም ተኣትሐዜ ሰበት ኣምር፡ መትደጋግ እት ፈርያት እተ’ዬ እወዴ።

ለዐማር ጀራዲን፡ እት ዕልም እንዴ ኣተንከብን እንሸቅየ ህሌኩ። እብ ዐቢሁ ሰብ ምህንት ሐርስ ክል-ዶል መጦርን በዋር። እብ ጀህቲ ምስል ብዬቱ ተጃርብ፡ ድሩስ ብዙሕ ናስእ ምኖም ኣነ። ምን ወክድ ዲብ ወክድ እት ሐርስ በቃዐቲ ምን ገብኤ ወኣምርዬ እት ዘይድ መጽእ ህሌ። ሐረስቶትመ ምን ኖሰኖሰን ለእንረክቡ ተጃርብ ሐዞቱ ቡ።

ሰኣል፡ እት ሰንዖት ቅድረት ክም ብክ ከበር ረከብኩ ከእብ ክሰሉ ገሌ ወቲልክ ሰኒ ዐለ?

በሊሴ፡ እሰልፍ ሐርስ እብ ምራድ ቱ ለትበገሰኮ እቲ። ‘ምራድ ኣሳሰ ኩሉ ተጠውር ቱ’ ምን ልብል መብደእ እንዴ ትበገሰኩ።



ኣፍገርኮ ዲበ። እትሊ ሸቅልዬ ለልትዓወኖ ምስልዬ ህዬ እብለ መናሰበት ሐምዶም።

ሸፍር እባሁ ዲብ ገርህት ኣጊድ ኢልትሓበር ወኢሊሐቅቅ። እብለ ማሸን እንዴ ደቀቅክዉ እተ ገርህት እነሰንሱ ሰበት ህሌኮ ላኪን፡ እባሁ እት መንፈዐት ብቅል ልትበደል ህሌ። እለ ማሸን ሕምስ ኪሎ ለገብኤ መሸመዕ ምን ክቡ፡ እት ቀበት ክልኤ ደቂቀት ትደቅቁ። እሊ መቶር እት ሐቲ ኢነት ክልኣት ሸቅል ኣወቂ እቡ። ማይ እገል እቡ ወሸፍር እዋሕን እቡ። ኖሼ ለሸቁክዉ ኣለት እበ ሸፍር ድቁቅ ኣፈሬ ዲብ ህሌኩ፡ ሐበን ልትሰመዐኒ። እበ ሸፍር ህዬ ለግረህዬ ርሽድ ወእተዩመ ብርኩት ቱ። እምበልሁመ ለዘርኣክዉ ድቡ፡ ናይ ከዘኖት ዕምሩ ውሰክ ህሌ። መክተብ ሐርስ ምዴርየት ኣቋርደት፡ ለሐረሽ ክቦ ኣምጽኣዩ እግልዬ መክሰብ እብ ሐትሐቲ ሕቡርም ቱ ህሌኩ።

ሰኣል፡ ሐርስ እት ኣሰነዮት መንበረት ከኣፎ ትቀይሙ?

በሊሴ፡ እት ሐርስ ከዲም ሰኒ ኔፍዓይ ራክቡ ህሌኩ። ምን ሐርስ ወንዋይ ለእንረክቡ እተይ እቡ ቱ እት መንበረት ጣፍሐት ወቅዘእ ለበ መኅት ንትዐዴ ለህሌኩ። ሐርስ ወጀራዲን ቱ ህዬ ኩሉ ገቢል ለረፈዕ። ጼወ ተኣትናብር እቡ፡ ኣቃርብ ተዓውን ምኑ፡ ወሕጉዛም ተኣረቲዕ ምኑ። እብ ቅድረቲ፡ እትሊ ጀራዲን ኣብካት ሸቅል ካልቃም ክም ህሌናመ እግል ሐብር እፈቲ።

እት ክል ኣካን ልትላከፍ ለዐለ ክቦ ወሸፍር ንዋይ እትሊ መደት ጎን እለ ማሸንዬ እግል ለኣሸቂ እብ መሸምዓት ምን ኣዳም ንትዛበዩ ህሌኩ። እሊ እግል ኖሱ ዲማት እተይ ጋብኤ እሎም ለሀለ ጀሃት ህለው። እት ሱግ ለነኣዘብዩ ኩዳርመ፡ እብ ረኪሰ ዶል ነኣዘቡ፡ ለሸዐብ ነኣረሄ ክም ህሌን ሰበት ነሐሰቡ፡ ገናዐት ብነ።

ለዘት ፍራ-ካድም

ኣዳላይ ሰለጠት ምን በናን ዋራይ

- 5 ሐበት ከመዶር
- 1 ምግባይ ቅያስ ለበ በሰለት
- ¼ ክባየት-ሻሂ ምን ዜድ
- 20 ሚሊ-ሊትር ለይሙን

ኣው ኣቶቶ

- 1 ኪሎ እት ማይ ለትጩፈ

በናን ዋራይ

- ርቦ ኪሎ ሰለጠት (ክም ኣትሐዘዮቲ)

ኣግቡይ ኣዳለዮቱ

ለእብ ማይ ባሽል በናን እንዴ ቀረፍናሁ እብ ምግባይ ቅያስ እንፈርመ። ለበሰልመ እንዴ ኣትነኣሸነ ኣው እብ ሸክል ሸራዬሕ እንመትሩ። ለከመዶር ህዬ፡ እብ መጀብ ምግባይ ቅያስ ልትከተፍ። እት ግራብ ነዲፍ ኩሉ ምስል ነኣብሩ። ኣክር ህዬ፡ ለይሙን እንጨምም ዲቡ ኣውመ ኣቶቶ ነኣብር እቲ ወእግል ብለዕ ነኣዳልዩ።

ዲማት፡ መወለብ ክቲብ ወሰክ-ዐውል እት በናን፡ ዲሰምበር 2021



እብ አቀጥፍ ከደን፡ አጽለዐተ ለትዳዌ ሀቡይ



እት ኡጋንዳ ለትነብር ሀቡይ (ቺምፓንዝታት) ጅርሐ እግል ትዳዌ አቀጥፍ ትትነፈሳ።

ባሕሲን ጃምዐት አክሰፎርድ ምስለ እት ደዋዊሕ ለነብሮ አንፋር እት ልትሳደው እት “ገልዋት ቡደንጎ” ሐዋናት እግል ነፍሶም ወምኑ እንዴ ሐልፈው እግል ሕድ

መራዐየት ወሰዳይት ወእብ ፍንቱይ መትነፍቶት አቀጥፍ እት አወላይት ራድኢት ለልክርኤ እብ ሰወር አዳለው።

እት ለሐልፈሪ 10 ሰነት እት ገብእ በሐሰ ሀቡይ (ቺምፓንዝ) እግል ደወ አቀጥፍ ክም በልዕ ተኣከደ። ምናተ ለሀቡይ እትሊ ወቅት ጎነ

ለቀጠፍ እግል ሰፊፍ አጽልዐትመ ክም ትትነፈሳ ምኑ ተኣመረ።

ለዐለማእ እለ ሀቡይ እት ድበዕ እግል እስዓፍ ለትትነፈሳ እብ አብላር ለሸፊሕ ሰጅል እብ፡ እግል ዐስር ሰነት ለልተላሴ ዕልማይ-በሐሰ እዱሉያም ሀለው።

ለእት መጀለት ፍሮንቲየርስ ኢን ኢኮሎጂ ኤንድ ኢፕሉሽን ለትጠብቦ ብሐሰ ሀቡይ ወገሪለ ለመስሎ ሐዋናት፡ እትሊ ከደኖም ዓፍዮቶም እግል ልራዑ ለትፈናተ ጠቢዕያይ አስርየት ክም ልትነፍሶ ለልክርኤ ቱ። እሊ ሀይ፡ እግል ቀደም እለ ገብእ ለዐለ በሐሰ አኪደት ለልሀይብ ቱ።

ለዐለማእ ምሮ ሀቤያይ ንኡሽ እግል እሙ እብ ቀጠፍ ዕጪይ ገርብ ዲብ ማሴሕ እለ ለልክርኤ ሰወር ሺድዮ ሰወረው። እምበል እሊመ ለዐለማእ ሀቡይ ምስል አዳም ለልክትማስለ ጠባይዕ ለመድ ነዳፊት ክም በ ሸርሐ። እሉም መጅመ-ዐት በሐሰ ምነ ለሀቡይ ትትነፈሳ እብ አቀጥፍ እንዴ ነስኣው ክም ጀሪበዉ ወመብዝሐ ለአቀጥፍ ድድ ባክቲርያ ክም ቱ ክም አከደው ሸርሐ። እብሊ ሀይ፡ ሀቡይ ምነ ፍክር ለብ ወረሕመት ፍንቲት ለመልክ ሐዋናት ክም ተ አከደው።

አግደ መናፍዕት ዘንጀቢል

• መናዐት ገርብ ለአተርድ፡ ድድ ባክቲርያ ወሻይሪስ ሰበት ገብኦ፡ ምን ገነፍእ ቀለል ዳፊዕ።

• ቦለል ለአብዱ፡ እግል ዐምሳት፡ እት ወቅት ሰፈር፡ ክምስልሁመ ሐቆ ዐመልየት ለተርፍ እትነ ቦለል በንጅ እብ ሸፋግ ለአትሀድእ።

• መጸት መፋሰል ለአነቅሱ፡ ዘንጀቢል መጸጸት መፋሰል ዓጭሞታት ገርብ ወአሰዑድ ለሀውን።

• ቅያስ ስከር እት ደም ለትአነቅሱ፡ እግል ጅንስ ስከር ደረጃት-2 ለዐም አንፋር ቅያስ ስከር ደምም እግል ራቀቦት ነፊዕ።

• እግል ዓፍየት ሐንገል ሰዴ፡ ዘንጀቢል ናይ ፍቅደት ቅድረት ሐንገል ለአተርድ፡ በሀለት ምን ሕማም ርሰዴ አው ዘሃይመር ከፊዕ ምነኒ።

• ሕማም ሽቤሕ (cholesterol) ለአነቅሱ፡ ሽቤሕ ለአነቅሰ ወእግል ዓፍየት አሰራር ደም ወልብ ሳዕድ።

• እግል ሰርዐት ሐቀቀት ነብረ ነፊዕ፡ ዘንጀቢል ለእንበልዐ ነብረ ምን ከርሸት እብ ሻፍገት ክም ተሐልፍ ወዴ ወመትነፈሐት ክብድ ለአብዱ።

• አንሳት ምን መጸት ደውረት ዳፍዕ እግለን፡ እብ ደውረት እት አንሳት ለመጽእ ውጃዕ ክም ደወ እንዴ ገብእ ከርዑ ምነን።

• ድድ ሕማም አፍ፡ ዲብ አፍነ ለልትረከቦ ባክቲሪያ ክም በዱ ወዴ ወእግል ዓፍየት አንያብ ነፊዕ።

• ከባደት ገርብ ልትዳገን፡ እት ገርብነ ለልትከእለል ሽቤሕ ክም ነድድ ወዴ።



ክጅል እብ ከፎ ነሐድገ?

ገሌ አንፋር እብ ሰበት

ክጅል ምን ብዙሕ ሓጃት ተርፎ።

ከክጅል እብ ከፎ ንትነጃ ምነ ለልብል ሰኣል ዐለማእ ክእነ እት ልብሎ ምክሮም ለሀይቦ ዲቡ።



• ለልክክጅለክ ጋር ሚ ክምቱ አክድ። እት ቀደም አዳም ጅምዕ ትበጥር እት ሀሌኩ እት አካፍት ወአዳም ሐዲስ ትገይስ እት ሀሌኩ ለትአምሩ ወለትዐጅቡ ነፈር ትርኤ እት ሀሌኩ አይ ምኖም ቶም እብ ሸዑር ክጅል ለትሸዕር ምኖም አክድ።

• ደማነት እት ነፍስ እግል ትጠውር ጀርብ፡ ክል ነፈር ህቱ ሌጣ ለመልክ ግርመት ቡ። ምን እሊ እንዴ ትበገስከ ነፍሰክ ሚ ክም ትአምር ወሚ ወቀይ ክም አውቄት ትሰኣለ እንድኢኮን፡ እብ ክሰብ ግርመት በረ እት ተሐሰብ ወቅትክ ኢትሓልፍ። ሰበቡ እሉም ለእብ ግርመቶም ለልትመክሐ አንፋርመ ገሌ እት ነፍሶም ለኢለዐጅቦም ጋር ክም ሀለ አክድ።

• ነፍሰክ እብ ራሐት ክም ትሸዕር ውዴ፡ ነፍሰክ ምስለ ለትፈትዮም አንፋር እንዴ ገብኦት እብ ደማነት ነፍስ ክም ትሸዕር ውዴ። እግል እሊ ለሰዴክ ንቃዋ ዶል እንርኤ ሀይ፡

*ዕንታትክ እንዴ አቀመጭክ እግለ እግል ለአክጅለክ ለቀድር ሓጃት እት ፍክርክ ትካየሉ ወሰውሩ

* ምስል መልሀያምክ ዕላቀት ትርድት እግል ትብኔ ጀርብ፡ ሰበቡ እግል ተጠውርክ ምን ቅሩብ ለታብዖ ህቶም ሰበት ቶም።

* ምስል አዳም ሐብር ግበእ

*ምስል አዳም እት ትገብእ እቱ ወክድ ገጽ ፋሬሕ ለሀሌ እግልኩ፡ ሰበቡ ገጽ ፋሬሕ እት ክል መርሐለት ናይ ሐያትክ ምስል ብዝሓም አንፋር ዕላቃት እግል ለሀሌ እግልክ ሰዴ።

*ረኣሰክ ለዐል እንዴ ረፍዐክ እብ ዋዴሕ ረኣይክ ሂበት።

*ለልክሕቅ ጋር ዶል ልትረከብ እግል ትሰሐቅ ወጥን

*ምስል አዳም እት ትገብእ እቱ ወክድ ርሕክ እት ሸቅል ብዕድ ኢትሻቅሉ፡ እግል መስል ቀዋቃል ወጫቃዋ ሞባይል መስል ምኑ እዘም።

ሰደ ለሐልፈት ፍቱ ምራየት እት ሸቀላት ካሬ

ምራየት ምን ቤት በረ እት እንፈግር እቱ ወክድ ለብሰትነ ወሸክልነ ሚ መስል ክም ህለ እግል ነኣምር ንትነፋዕ እብ፡ ምራየት ምስል ዓቅልየትነ ለባቱ መትጃባዋ ለልብሕሶ ዐለማእ እት ሸርሐ፡ እብ ትሉሉይ ምራየት ግንሐት ሸቀላት ክም ሰብብ ወደማነት ነፍስ ክም ተኣብዴ ወድሐ።

ለዐለማእ ምራየት እት ለንትዐፊ እቱ ወክድ፡ ዕንታትነ እግል ረዩም ደጋይግ ዶል ነኣቀምት እብ እት ጠባይዕነ መሻክል ክም ክልቅ እትነ ሸርሐ። እሊ ሀይ እት ዐቅልየትነ ሸዑር ሸቀላት ሰብብ ወእሊ እብ ትሉሉይ ዶል ገብእ

ዲብ ሕማም ዐቅል እግል ልትጠወር ቀድር። ገሌ አንፋር እት ክል ቤት ለህለ ምራያት በጽሕዉ፡ እሊ ለወዱ እብ ሰብብ ሀይ ገሌ ምነ ምራያት ለአገርሞም ወገሌ ምኑ ለአከፍኦም ለህለ ሰበት መስሎም ቱ። እሊ መሻክል እሊ ዶል ልዳጋም ሀይ ደማነት ነፍሰክ ክም ነቅሰ ወእት ብዕዳም አንፋር ዐገብ እግል ንርኦ ዳርከኩ።



እሊ እግል ሀወኖት ምን ግንሐት ምራየት እግል ሕዱድ አምዴላት እግል ንትሐ'ረም ክም ብእነ ለዐለማእ መክሮ።

እት ደንጎበ እሊ መሻክል

10 ፍንቲት ሰወፎ ሕዘው



ምነ እት ተእሪክ ዐድነ ምህማት ላተን ዕሎታት

- 1980 ዮም 17 ኦገስት) ኡቶብዩ ዲብ ጀብህት ቅብለት ምፍጋር ሳሕል ህጃማት ወዴት።
- 1980 ኦገስት 28 - ኑቭምበር 27 ጀብህት ሸዕብዩት እት ወቅት ካልኣይ ሓርብ ዐድ-ሕድ፡ እግል ጀብህት ተሕርሪር ኤሪትሮፖ ምንለበዘሐ ኣካናት
- ኤሪትሮፖ ኣፍገረተ፡ እተ ወቅት ለሀይ ኣሕመድ ናስር እብ ዜረኖት እትሓድ ሶፔት ምስል ሕኩመት ደርግ ለሀድግ ዐለ።
- 1981 ዮም 23 ኖቨምበር ጀብህት ሸዕብዩት ሙስተቅበል ኤሪትሮፖ ለቀርር መሸፍኖ እስትፍታኢ/ ሪፈረንዶም ቀደመት።
- 1981 ዮም 24 ማርስ ጀላብ ውሕደት ተናዚም ኤሪትሮፖ ብግስት ለዐለት እትፋቅየት ቱንስ እት መዓለ እንዴ ኢትውዕል ተርፈት። ሱዕድዩ እግል እት ቀበት ጀብህት ተሕርሪር ኤሪትሮፖ ለዐለት ሐረከት እስላም ሰዓይት እግ ተሀብ ኣንበተት።

ምን መናፍዕት ቅርንፍል

- ቅርንፍል ጠቢዓይት ዝሕረት እግል መዳዳት መእረር ክም ከረ (ኣጃኖል) ለመስሎ ቀመማት ክምክም፡ ወየም ኣለቦም ናይ ዓፍየት መናፍዕት ሀለው ዲቡ። ክምነ ዲቡ ለልትረከቦ መናፍዕት እሊ ተሌ እግል ንሳሚ እንቀድር፤
- ዓፍየት ኣፍ ወእንጃብ፡ ጠቢዓይ መሀውናይ መጸጸት ኣንጃብ ቱ፡ ወእግል ረከስ/ እልትሃባት ዓሳርመ ሰራይ ቱ። ወእግል ዲብ ኣፍ ኣከይ ጤነ ለወድዩ ባክቴርያታት ለኣበዴ።
- ምነ እብ ሰብብ ጀራሲም ለመጽእ እልትሃባት ዳፊዕ፡ እት ጽበጡ ኣጃኖል ሰበት ልትረከብ ዲቡ፡ እልትሃባት ወክሰተን ህዩ ክም እልትሃባት መፋሰል ገርብ
- ለመስሎ ክም ልትሀወኖ ወዴ።
- መናፍዕት ገርብ ክም ትደቀብ ወዴ፡ ጅሃዝ መናፍዕት ገርብ ክም ትትደቀብ ውበዝሐ ጸዓዲ ሴላት ደም ክም ዘይድ ወዴ።
- ጅሃዝ ዋሕኔ/ሀድም ሰኔ፡ እት ሳራይ እት ጅሃዝ ሀድም ለመጽእ ሕማም ለኣወቁ፡ ንፍሐ ለሀውን ወእግል ከርሸት ሕጃብ ገብእ።
- ዓፍየት ልብ፡ ዴራይ ኮሊስትሮል ወሰለስ ኣሸበሐት ለኣውሕድ።
- መናፍዕት ግርመት (እግል ገኖበት ወጭገር)፡ ሴላት ገኖበት ክም ልትሐደሰ ወዴ ወጭገር እግል ልብቀል ወምን መትከፍካፍ እግል ልድሐን ሰዴ።
- ነዘምት ሱከር፡ እግል ሐሰኖት ወዘፈት ኣንሶሊን ሰዴ ወምስተወ ንሰበት ሰከር እት ደም ለዐቅብ።
- ገበይ መትነፊዖት፡ እብ ከኣርክ ዲብ እንተ ወርት ኣውም ክልኣት ምስማር እግል ትምጫር ምኑ ትቀድር፡ ኣውመ ህዩ እት ማይ ሕፋን እንዴ ጩፊካሆም ዶል ትሰትፍም ብዝሕት ናይ ዓፍየት መንፈዕት እግል ትትረከብ ምኑ ትቀድር።
- ልብ ለእንክፊ ዲቡ፡ ምን ቅያስ ወሰዕል እግል ንንሱኡ ኣለብኩ፡ እብ ፍንቱይ ህዩ እት ወቅት ዕምሰነ ልግበእ ወምስል ደም ለልትጸበዋ ኣምራድ ዶል ለሀሉ ህዩ ምክር ሐኪም ተኣትሐዜ።

በሀል

- ልወቅ እት እንተ እግል ትንበር ሐቕ ሐዜኩ፡ እት ክሉ ለመባዋር ኢትብጠር ወደለ እተ በጠርክ መዕረክት ኢቲዴ፡ ወደለ እተ ባክ ህሌት ክለ እንትባህ ኢተሀቡ፡ ወሕብዕት ኢትሐንፍል፡ ወክድንት ኢትቅለዕ፡ ወደለ ትነዌት ኢትትባጠር፡ ወደለ ገብኣት ክለ እብ ተፋሲሊ እግል ተኣምረ ኢትሕዜ፡ ምነ ኣዳም ደለ ምን ኬር ለትትረኡክ ምኖም ንሰኢ፡ ወዴብ እግል ትርከብ እንዴ ትቤ ኢተሐናፍል፡ ለክልቅ እግል ኬልቃዩ እንዴ ሐደግካሁ ለእዲነ ተኣሲርር እዘም ምነ።
- ክሉም ለሓባር ምን ሕብር ጸዕደ ልትበገሶ፡ ለባካትክ ወለ ለእለ ጸልመተ ልጸልምት እንተ እግል ጸዕደ ሕብር እት ልብክ ዕቀቡ፡ እት ከርስክ ወክደንክ ጀላል ግርመት ክም ትትሰርጌ ግበእ፡ ዴማት ፈተ ወሰላም ላተ ነፍሰ ግርም ሌጠ እግል ትግበእ ብኩ።
- ዐውቲ ሐቲ ዶል ፍንጌ ምዕል ወላሊ ኢትትረከብ፡ ህተ ምነ ምዕል-ምዕል ለገብእ መጅሁዳት ነኣይኹ፡ ወምነ እሉ እንወዴ ኣክጣእ ለእንረክበ ድራሰት፡ ወክል ዶል እምበል ሕላሌ ለእንዳይም እቲ ኣሲራር ትትርከብ። ከእለ ምን ትገብእ ሰብርክ ዕቀብ፡ ወእንበል ሕላሌ ኣተላሊ፡ ወልብክ እተ ጀላብ ዐቦት ነፍሰክ ለትወድዮ መጽግም ክረዩ።
- ኣስክመ እሊ ትንፊሳይክ ሀሊ፡ ደለ ገብኣት ክለ ሙምክነት ቱ፡ ክሉ ረኣሰክ ምን ጀርቤ ኢትብጠር፡ ወምን ዕምርክ ታርፈት ለህሌት እትለ እዲነ ለሕሰት ክም ትገብእ ውደዩ።
- ወእብኬ በል ወእትሰሐቅ እዲነ ላተ እግል ተኣተላሌቱ። እግል ነፍሰክ ሐቲመ እግል ትትነፊዕ ምኑ ለኢትቀድር ህመም ኢተኣርፈዕ፡ ህመት እግል ፈጅር ለትመጽእ መጸጸት ክም ኢትከረዕ፡ ምናተ ለናይ ዮም ለውቀት ክም ትሰርቅ ፍቀድ።
- እት ሰልፍ ድፋሪ ላቲ ጋራት እት ትወዴ ኣንብት፡ ሐቀሁ ቅድረትክ ላቶም ጋራት ውዴ፡ እተ ዶል ለሀ ኣመተ ኣለብክ ምስተሐላም ላቶም ጋራት እግል ቲዴ ቱ።
- እዲነ በኪተት እት ውዳይ ሰኒ ትትብኒ፡ ወክልመ እግል ብዕዳም ሀብክ ወሰዴኩ፡ ለተዐቀብል እትከ ለውቀት ወኬር እት ወሰኑ ጎይሶ።

ዝበድ ዝዖታት

- ውላድ ኣደሚ ክመ እት ኣብሐር ቶም ብዙሕ ልትፈናተው፡ ገሌሆም እግል ትውሐጠ ለኢትቀድር ጩወት ገበእ እት ሀለው፡ ገሌሆም ህዩ ሰኒ ጡዑማም ቶም። ደለ ገዱ ገረመ ዕሸረቱ ግርምተ በህለት ኢኮን። ወደለ ዘዐቱ ገረመት ውዳዩ ግሩም ቱ በህለት ኢኮን፡ ወደለ እንበተቱ ገረመት ደንገባህ ግርም ተ በህለት ኢኮን፡ ወደለ እት ሀለዮትክ ገረመ እት ግራክ ግሩምቱ በህለት ኢኮን፡ ኣልባብ ህዩ መስከብ እግል ልግበእ ትከለቀ እንዴኮን ምዕራፍ ሐልፋይ ገበይ ለለዓርፍ እቲ ኢኮን።
- ፈተ ኬር እግል ብዕዳም ጅሃድ ቱ፡ ወእሊ ጅሃድ እሊ ህዩ ልብ ሳፊ ሌጣ ቱ ለልትበገስ እቲ ወልክህሉ። እትወቅት ክርበትን ገለብ ወሕጌ ለገብእ እግልነ ህዩ፡ እት ወቅት ክርቡዮም ሰይፍ ወኮናት እንገብእ እሎም። ከእት ወቅት ረከ ቅሩብክ ወእት ወቅት ክርበት ጋነ ለገብእ እግልነ ምን ኬር ሐብትመ ኣለቡ። ወክሎም ለተዩል ለሐልፎ ወግራሆም እንዴ ሀበው ገይሶ፡ ምናተ ክሎም ለተዩል ልትረስዖ ወምን ኣልባብ በዱ በህለት ኢኮን።

ልባብ

ሽቅል ሕሽመት ቱ

- ምርት እናስ ላብብ ው'ላድ ህኩይ፡ ሽቅል ለኢፈቲ ዐለ እሉ። እሊ ጋር እሊ እግል ኣብ ሰኒ ሻቅሉ ወሀመት ወዴ ዲቡ ነብረ። ሐቲ ምዕል እግል ው'ላዱ ሽቅል እግል ልትፈረር ወርዝቅ እግል ልሕዜ ጠልበ ምነ።
- እሊ ው'ላድ ህኩይ እሊ ክም ሰምዐ ሰኒ ተኣሰፊ። ምናተ ዋልዳዩ ምን እለ ፍክረት እሊ እብ ቀለል ክም ኢልትናዘል ክም ኣመረ፡ ሐቲ ፍክረት ዶል መጽኣት እሉ ለውቀቱ ኣቅበለት። ለፍክረት፡ ህቲ ክምለ እዩዱ ኣሰቦሕ ምድር እንዴ ትፈረረ፤ ለነሃሩ ክለ እት ትልህያታት እንዴ ኣለፍዩ ምድር ክም መሰ ክምለ እት ሽቅል ውዕል ለዐለ እንዴ ኣተምሰለ ቤት እግል ለዐቅብል፡ ወኣቡሁ ምንለ እሉ ከሰበ ማል ዶል ልትሰኣሉ እኩቡ ለዐለ ምርት ዲናር እግል ለሀቡ ሐሰቡ፡ እለ ፍክረት እሊ ሰኒ ሰበት ዐጅብቲ ኣክል ሕድ ክምስልህ ወደ። ምናተ ለእናስ ላብብ ሰኒ ዓቅል ሰበት ዐለ እለ ፍክረት እሊ ብዙሕ ዐውቲ ኢረክበት። ወልዱ እሊ ለእሉ ከሰበ ማል ኣክል ኣዩ ገብእ ልትኣዩስ እቡ እግል ለኣምር ሐዘ፤ ከእግል ዲናር ለጀናሁ ሀበዩቲ፡ እት ቅሩቡ እትው ዐለት እሳት ለክፈዩ፡ ለዲናር ነ'ደ ምናተ፡ ለጀነ ለጋር ወላ ኢትሻቀላማ እቡ። ኣምዕል ሓራትመ ላጋር ክምለ እሊ ዐለ ትደገመ። ሐቕ መደት ለጀነ ለእሉ ውፋር ዐለ ማል እብለ ገበይ እሊ ክም ትከለስ ምነ፡ እተ ዶሉ እት ሽቅል እግል ልትፈረር ቀረረ፤ ውእሊ ኢወደ ምን ገብእ እግል ኣቡሁ ለለሀይቡ ዲናር ምን ኣዩ እግል ልምጸኣቲ .. ፈጅራተ ጽቤሕ ምድር እት ረቢሁ እንዴ ትወከለ ሽቅል እግል ልሕዜ ኣሰቦሕ ተበገሰ። ወሰኒ ሕ'ሱር እት እንቲ ሽቅል እግል ልርከብ ተሐት ወለዐል ቤለ፤ ወእብላሁ ለእቲ ልትበገስ ሽቅል ረክብ፤ ወእትሊ ሽቅሉ ነሃር ካምለት እት ሽቄ ውዕል እንዴ ዐለ፤ ማሲ ምድር ሰኒ ትዕብ ወፈትራን እት እንቲ ዐድ ዴረ። ለዲናር እግል ኣቡሁ ሰለመዩ፤ ለኣብ ክምለ ዓደቲ እግል ዲናር እትለ እሳት እግል ልልክፋ ዶል ኣፍክክ፤ ለጀነ ዕንቀሩ እንዴ ሽልዐ፤ “ይበ ሚ ትወዴ ህሌካ? እሊ ዲናር ሐቕ ብዙሕ ተዐብ ወየም ኣለበ ለሀበት ክም ከዴኮ ቱ ለረከብክም” ቤለዩ፤ ለኣብ ትሰሐቀ፤ ወለ ጀናሁ እሊ ዲናር እሊ እብ ኣማን ሐቕ ብዙሕ ተዐብ ወጀርሰት ክም ረክበዩ ተኣክደ፤ ወለማል ፍሬ ተዐብ ወዓቢ መጅሁድ ናይለ ጀናሁ ክምቲ ኣመረ፤ ከእዴሁ እትለ መርከብለ ጀናሁ እንዴ ከረዩ፤ እትለ ህብጡ እንዴ ኣተዩ እትለ ረኣሱ ጠሰዩ። ወለጀነ ምንለ ውዳቱ ሰበት ከጅለ፤ ምንለ ኣምዕል ለሀ ወሐር እብ ኖሱ ኣሰቦሕ ምድር ኣሰክ ሽቅል እት ልትፈረር ኣንበተ።



ተበሰም

ለዕነት ረቢ ብዲብዩ

- ምርት ነሳብ እት ገበይ ሰፈር እት ጀማዕት ሐቲ ተሓበረ፡ ከምርቶምተ ከሓጀት እግል ሴፋሆም ለትገብእ እግል ለኣትፋግር ቀረረው፡ ከክል ምኖምተ ኩ- ኣነ እለ ብእትዩ ወኣናመ እለ ብእትዩ ትባህለው፡ ለነሳብ እናስ ዲቡ ክም በጽሐው ህቲ ህዩ ወኣነ ... ብእትዩ ቤለ ወትም ወደ። ህቶም ህዩ “ እንተ ህዩ ኣፎ ኣዘምክ፤ ሚ ብእትክ፤” ቤለው።
- ለዕነት ረቢ ብእትዩ ቤለዮም።
- እለ ክም ሰምዐው ትሰሐቀው እቲ ወምነ ኣትፋገርት ሳመሐው።



(3^ይ ክፋል)

መንበ ትግረይት



ኬትባይ ቅስት መንበ ትግረይት ኢብራሂም ሓጅ እትኢኮን ከም እግል

አነ ምን ንእሼ እግል እርአዩ እተምኒ ለዐለኩ፡ ዶልክ ወስፍ ዎሮ እቡ ልትካዩል እግልዬ ለዐሉ፡ እግሉ እንዴ መሰልኮ አሸግር ውበዕድ ክቱብ እብ አትጋራም እቀርእ ለዐለኩ፡ ወአነ ለከተብኩሁ አሸግር አው ቅስት እንዴ ቀርእ እብ ስሜቼ እግል ለሐምደኒ እትወሽመሉ ለዐለኮ ወዶል ንዮቼ ክም ተመት እግልዬ እንዴ መሰሉኒ ፋሽ ልትሰመዐኒ ለዐሉ፡ ዮም ሙሰ መንደር እብ ሰደፍ መጦርዬ ክምሰል ርኤክዉ ደንገጽኮ የአምር ወለ ተዐጅብኩ፡ አዜመ እብ ሕውሬርዬ አቀምቱ ዐልኩ፡ ህቱ ክምሰልቱ ሸክ ኢወዴኩ፡ ብዕድ ሙሰ መንደርመ እብ ሰደፍ እግል ለህሌ ቀድር፡ ምን ሰኒን እት ረዋዲ እትበሰጥ እበ ለዐለኮ ህግያሁ ምን ቀበት ራድዮ እንዴ ፈግረት ምን ሰምዐኩም ኢትቀየረት እቼ ህተ ሌጣኩ፡ ከእብሊቱ ሸክ ለኢወዴኩ፡

እብ ሸቅል ሰሓፊት ምን አስመረ ክሩይ ለዐሉ፡ አውመ ብዕድ በርናመጅ ለዐሌ እግሉ፡ ለእግሉ አምር ዐልኮ አለበ፡ እተ ሸንጠቱ ለዐለ አላት ሰሓፊት ከረ መክሮፎን፡ ሰጃላት፡ ወከሚረት ገብእ፡ አው ልባሉመ መን ገብእ እመር ኢኮን፡ ምን እንዴ ረአዩ፡ እግልዬ ለትከሰስ ሸክ ለአለበ ርእየት ሙሳ ተ፡

አዩ ሰሕፊ ህይኒ ምን አዳም ለብዕድ እብ ልባሉ ምንገብእ፡ ጽዋሩ ወሸኽሰዩቱ ፍንቱይ መሰለ ዲብዬ፡ ለእንዴ ይእርእዩ ወየአምሩ ሀይቡቱ ለዐለኩ፡ ለብዋረት ክመ እወስፋ ለዐለኮ መረ ረዩም ኢኮን፡ ብትከት ግርም፡ ዐካከት ነፍሱመ ክምለ ወስፈቼ ሸበህ ርይመ አውመ ሸውየ ቅዋን ልብል ምኒ፡ እተ አውሳፍዬ ሳደፈ እግልዬ ለእብሉ ለደግድጋሁ ቱ፡ ሙሰ ደግድግ ግሩም ሰኒ ኩትን ወምሹዋ ዐለ ዲቡ፡

“እግል እትሳለሙቱ” እቤሉ እግል መላህዬ፡ አዜመ ክርንቼ እንዴ ይእወቅል፡ እዳዬ እንዴ መደድኮ አስክ ሙሰ ትወሉብኩ፡ ረቢ ዐልም ወከንዶእ እት ኢኮን ሙሳመ ለሐከታካትን ሸዕር እቡ መሰል ዐለ፡ እብ አፋዬ ክርን እንዴ የአሰሚዕ እዳዬ እግል ሰላም መደድኮ ዲቡ፡ እምበል መዋፈቀቱ ጋይሰ ለዐለኮ መላህዬመ ዐሬኒ

ወትሳለመዩ፡ “መርሐቡ፡ ባሰጣም ወትሩዳም፡ ከአፎ ሀሌኩም፡” ቤሌን፡ “አልሐምዱልላህ” እቤሉ፡ ለእግል እንብል ወእንዳግም ወለምን ንትሰኣሉ ወለንትካበሩ ሐበት የዐለት እግልን፡ ላማ ሰላምን ናይ ድንጉጽ ትመሰል ዐለት፡ ሙሰ ላኪን ቀረድነ አመረ መሰለኒ እብ ዕን ረሕመት ገነሐነ ዐለ፡ ክእነ ክምሰሌን ሱዱፋ ለዐሌ መምክን፡ ክሉ ለአምሩ

ለአምር፡ ኢኮን ሕነ ለእብ ትምኒት ሌጠ እግል ንርአዩ እንፈቱ ለዐለኩ፡ ላመ ጀዋባቶም ቀርእ ለዐለ እብ ጀዋባቶም ለአምርም ገብእ እትኢኮን እብ ገጽ ላቱ ክሉም ርኢ ኢገብእ፡

ለህ እንዴ ይእንብል ወለህ “ንዕኖ እንቱም ለደረሰ” ቤሌን ለሙሳፍሪን ሰጅል ለዐለ ነፈር፡ እንዴ ሰጅሌን ዲብ አተቡሰነ ትጸዐን፡ ሙሰ ዲብ አወል ክርሲ መጦርለ ሰዋግ ልትገሌ እት ሀለ አነ ወመላህዬ ዲብ አክርለ ክርሲ ናይለ አተቡሰ ትገሌን፡ “ምሰል ሙሰ ግሱያም ምን እንገብእ ወዳገምን ምሰሉ ሙሸ፡” እቤሉ እግል መላህዬ፡ “ሕነ እብ ሐሰብ ወሰግድ አክር አዳም ጽዑፍም ዲብ ሕነ መጦር ሙሰ እግል ትትገሌ ተሐዜ ሀሌክ ትጀንገክ መሰለኒ!”



ሸሂድ ሙሰ ምሰል መሐመድ እድሪስ ወክልሹም መሐመድ (2019 እምባትክለ)

ቤሌን፡ እብሉ ገብአት ምን ሰኒን እትህገክ ለዐለኮ ርእየት ሙሰ ሌጠ እንዴ ኢትገብእ፡ እብ እዳዬመ ትሳለምኩህ፡ እግልዬ ብድህ ዐባይ ዐለት፡

ዲብ መልህያምን ሐቆ ዒርነ “ዮም ሙሰ መንደር መጽአ ምሰልን ወትሳለምናሁ” ለእቤሉም መልህያምን፡ ገሌህም ምን በዲት ዋሙሕዬ ለአምር ለዐለው “አሰናይክ!” ዲብ ልብሉኒ፡ ገሌ እግል ሙሰ ለአምር ለዐለው ቶም መሰለኒ “ቤቱ እለ መጦርናተ ወሸቅሉመ እለ ፎርቶ እተ ረአሰናቱ፡ ዐደድ እለ ምን ተዐሌ በዲር ወኡበጸሕናክ ዲቡ” እበ ተሐብር እሻረት ትሰሓቀው ዲብዬ፡

ሙሳዲ ኢለአምረነ ወንዮትነ ዳሊ ኢኮን፡ እግል አድሕድ ዲብ

ነሐሽክሸክ ወሐሬ እንዴ ኢንትሳለሙ እንትብህ እግልነ ዐለ ምን ገብእ ልትፈከር ዲብነ ለዐሌ፡ ወመምክን ለአተቡሰ ሸፍገተነ እትኢኮን፡ ምን አዩ ክም ሕነ ወአሳሚነ ወትሰኣሌነ ገብእ፡ ያፊት እለ ፍርሰት እለ ርክብት ምን ተዐሌ ወዳገምን ምሰሉመ ወእንቤ! ህቱ ላኪን ሐቆ ለህ ፋቅድነ ኢገብእ፡

አነ ላኪን ሙሰ መንደር እብ ርእየቼ ወመትሳላሙ፡ ርሕዬ እግል ሙሰ ክም መላህዬ ወበዲር ለአምሩ አትመሰሰልኩህ፡ ወዲብ አስመራመ አዩማት ጸንሓም ምን እንገብእ፡ ለፋርሰት ወዜደት ወካልእ ኢንት ወትረኤን፡ ወምን ለአምር ምሰል ሻሂ ወሰቴን፡ ሕነ ላኪን ምን ነቅፈ ዲብ አስመረ ማጽአም እቡ ለዐለኩ መጃል ድራሰት እንዴ አብጠርነ እግል ተድራብ ዐስከሪ አስክ ገሕቴላይ ወማይ ውዑይ ትከፊን፡

አደም ጌሰ ወሐልፈ ወአናመ ምን ንእሽ ዐቤኩ፡ በዲር ዲብ እደርሰ እጃርቡ ለዐለኮ አሸግር አተላሌክዉ፡ እለ እት እብል ላኪን ለእክትቡ አሸግር ለልሐምዱ አው ለልሐምዶ እግልዬ ዐለ አለበ፡ ሰበት እለ ክርን ገቢል ሐቱ ቦጀል ሰበት ኢቀርኦ ወኢቀድሞ ሸዕርዬ ሰኔት እቶም ምን ገብእ ኖሶም ቀዱመ እግልዬ እንዴ እቤ እግል አወል መረት ሸዕር ለእኮ ዲቦም፡ ሸዕርዬ ዲብ ራድዮ ክርን ገቢል ትቀደመ

ወሙሰ መንደር ቀርአዩ፡ ቈግረትቼ ትነፈሸት፡ ነፍሼ ሐጅም ክምለ ወሰከት መሰለት እቼ፡


ሕርያን ሕላይ ሌጠ እልእክ እተ ለዐለኮ ክርን ገቢል ኤረትርዮ ሸዕርዬ ምን እትወቀዐ ለዐለኮ ወለዐል እንዴ ገብአት እበ እፈትዩ ወእትሰፍለሉ ለዐለኮ ሙሰ መንደር ሐቆ ትቀረኦት፡ ርሕዬ ምን ሸዕር ለዐባዩ ሐሰብክዉ፡ “ነሐምደክ ወግረ እላመ መሻረከትክ ኢትትፈንቱነ” ሐቆ ቤሌኒ ሀዩ አገርገሬኒ፡ አምር ክቱብ ልግበእ ወአሸግር ምንመ ለሐውን ቁርኣይ ትሩድ ሐቆ ረክበ ክም ገርም አመርኩ፡ እግልሚ፡ ናይ አወል መረት ሸዕርዬ ክምሰለ ናይለ አምርም ወእሰሚዕ እም ለዐለኮ እመራም ሹዐረ ትግራይት ክም ኢትገብእ ሰበት አምር፡ እለ ሸዕርዬ ዲብ ክርን ገቢል ለሰምዐው አንፋር

“ሸዕርክ ሰምእናህ፡ ግርም ተ” ዶል ቤለዉኒ “ዲብ ዐልም ተአመርኩ፡ ወሸዕርዬ ሰብከት ወሳገመት” እቤ እብ ልብዬ፡ እግልዬ ላኪን እብ ክርን ሙሰ መንደር ቃሉት ሐቆ ወዴት ካፍየት ዐለት፡

ለአምዕል ዲብ ከረን ዲብ እክጅል ምን ለትሳለምክዎተ ፈቀድኩ፡ “ክልልኦት ሕጻን እት ከረን እተ መውገፍ ትሳለመዉኩ፡ ምቶም አናቱ ለሸዕሩ ቀርኦክ” እንዴ ረኢኩሁ ክእነ ምን እብሉ ሙሰ ወፈቅዴኒ ገብእ እቤ፡

እብ አዩ ወፈቅዴኒ ላኪን ሸሂድ ሙሰ መሐመድ አድም (ወድ መንደር) ምንመ እርእዩ፡ ለምዕል ለህ ምንዬ ኢትብዴ እትኢኮን ሙሰ አልፍ ሸዕርዬርመ ምን ቀርእ ወትዘከረየ ኢመሰለኒ፡ አነ ላኪን እብ ረእየት ገጹ ሌጠእት አነ፡ ዮም ሀዩ ጀዋብዬ ቀርኦ ወሐምዴህ አሰምዴኒ፡ ምን እለ ተዐቤ ብድህ አለብዬ፡

ሐቆ እለ ሰኒን እለ፡ እት ክርን ገቢል ጀዋባትመ ለእኮ ምን ገብእ እብ ሙሰ ልትቀረኦ ወለ እብ ሰሕፊ ብዕድ ክሉ ሐቱ እርእዩ ዐልኩ፡ ለመድኮህ፡ ምን ንእሼ እንዴ ዐቤክ ብዘሕ ረኤክ ወሰምዐክ ምንገብእ ክሉ ዓዲ ገብእ ዲብክ



ሸሂድ ሙሰ መሐመድ አድም (ወድ መንደር)


መሰለኒ፡ ናመ መሻረከትቼ ሐቀለ እያምለ ሰልፍዬ በርደት፡ ዲብ ዓዶድ ውበዕድ ፍንቱይ በራምጅ ኢገብኦ ምንገብእ፡ ሐለትቼ ዲብ ሰምዐት ወቅራኦት ገብኦት፡ እብ ፍንቱይ መሰ ቅስት ዲብ ቀርኦ ሐቆ እሰምዑ ሀዩ፡ ምሰሉ ንኡሽ እት አነ ለአትአመረተኒ ወረቅበት ወመሐበት ለወዴት እቼ ቅስት “ምን ምድርነ ተወዝ ይእምብል” እፈቅድ ወግረ እላመ ኢትብዴ ምንዬ፡

ልተላሌ....

ሰምነ እክ ቦሎ ዐንሰባታት ለድበዕ ሐየትለ ገልዋቱ አባዩ ሮዩ ልትሐበዕ በነ በይን አለብክ አፍ ዕዩን በይንክ ኢትንበዕ ሙሰ ምን ክሉ ጌሰ ክብ በል ረኣሰክ ርፈዕ ድቦተ እለ ሳሕል ዐረድ እለ ኢትገደዕ እት ረኣሰ ሸንርብ ንዓለ ዜደ ዲበ ለውጀዕ ሙሰ እብ ዝናሩ ሰዋትሩ ዐለት ወድፈዕ ወህቱ ጀላል አፍያተ እት መሓብረ ወርበዕ እለ ለዮም ለብሰተ ቅመት ተ አስክ ትረፈዕ

እንዴ አባይኪ ቦለ በርክ ለሐበን ልባሰ ሐሰናተ ተአፍግር ምን ተዋብ ወሕራስ ምን ዐበ እተ ነኣሽ ሴቲት ወለጋሽ አምዕል ብኳያተ ማደት ሀሌት ፍራሽ ወሎሂ ፎርቶ ክበሰ ኢቲቦሎ በርሰሰ ሙሰ ምን ትብገሰ አምዕል ለእግል ትለበሰ መእመንዬ ጠልመዩ እበ ክእነ በህሰሰ አከይ መሰእል ፋጃአዩ ሰምሀር ልበ አተቅሰ ቀላቅሎታት ደናክል አድሕድ ሰጀዐ ወላቅሰ ምን ድሚረ እት ቁሳር ለበሐር ክልኦት ለረኣሰ ሙሰ ገድም ኢመጽእ እት መርኢቱመ ለተዐሰ አምዕሉተ ነስኦቱ ምሰል አርት ኢትበኣሰ፡

ያፊት ወኢትፈንቱነ በዐል ፈክነ ለሰኔት ብዝሕት ዋዲ አምዕሉ የዐለት ለፋርሰ አምሰለቶ ክም ዓዲ ትሰፍለልናሁ ሕናኑ እት አክራናትለ ረዋዲ ምን ለአምረ ለሰርዐት ነባሪለ ዐዋዲ አብ ረብዐተ ሀርበጠ ሹመ ለዐለ ቃዲ ምን ልቅርኡ እነ ለአሸግር ወምንቱ ለእግሉ ፋዲ ሓላዋይለ ቅሰሱ ከረለ ቀድዮትለ ቃዲ ምን ለሐንፍሉ ለዓዳት ርሱዕ ለህለ ወባዲ መራር እንተ ልክህለ ለእብ ሕክም ረቢ ራዲ ሻነ ወዴት እድንዩ ሚ እግል ኒበል ሕናዲ፡



ተቅሪር፡ ሙሴ ገ/አዝጋብሄር

ስወር፡ ክብርም ጸሃዬ

ሻምፒዮን ነዋዴ ኮቦሪት እግር ኤረትርፍ ተመ

ፊሪቅ አተሕራርሻ ሻምፒዮን ገብአ

3-2 ለቀልበዩ ደንደን፣ ለትልህዩ እተ እንዴ ተወወተ ናይ አስራዲ መዳልየት ሳልሳይ ደረጃት ትሰርገዝ።



እት 2ይ ሾትመ፡ ክልኢቶም ፍረቅ ጀርቤታት ሐድ እት ወዱ በሕ እብ በሕ ሰበት ትፈናተው፡ ዲብ ወሰክ 30 ደቂቀት አተው። እትሊ ሰር ሳዐትመ ጎል ላተ ኢትረከበ። እት ሪጎሌታት ክም በጽሐው ላኪን፡ አልተሕረር 4-3 እንዴ ተወወተ፡ 'ሻምፒዮን ነዋዴ ኤረትርፍ ሰነት 2026' ገብአ። ነፈር ናዲ አተሕረር ሪፖን መሐመድ ለሐሰ መተልህያይ ነስኦ። ደዓም'መ ፊሪቅ በሐር ቀየሕ፡ ደንደን ክእን እብ ሪጎሌታት እንዴ ቀልበዩ 2ይ ፋግር ዐለ። ዮም ዓመትመ ካልኣይ እንዴ ደግመ፡ መዳልየት ወርቅ ስርጉይ ሀለ።



እት መዲነት ከረን ገብእ ለአስመን ጅግራታት ሻምፒዮን ነዋዴ ኮቦሪት እግር ኤረትርፍ ሰነት 2026 ውላድ፡ ለሐልፊት ጅምዐት እብ ዐውቴ ናዲ አተሕረር ተመ። እት ትልህዩ ሰር-ነሃየት ደርብሕድ እግል ደንደን ወኡዱሊስ እንዴ ቀልበው ለሐልፊው ወዲብ ናይ መጀመ-ዐት ትልህዩ 1-1 ፍትቱያም ለዐለው ፍረቅ አተሕረር ወበሐር ቀየሕ እት ካቲመ ትዋጅህው። እሎም ክልኢት ፊሪቅ ትልህዩም ሕድ ለከርዐት ዐለት፡ ትልህዩም እብ ሰበብ ዝላም 40 ደቂቀት ምን ወክደ እንዴ አከረት ቱ ለአንበተት። ምን ጽባብሐ ለትልህዩ ሐን ሰይጠሪቱ እግል ለኣቱ ወዋን ለዐለ ፊሪቅ በሐር-ቀየሕ እት አፍያት አልተሕረር እግል ልብጸሕ

ወጎል ልሰጅል ላተ ደቅብ ሐግሎ፡ እት አወላይ ሾት ህዬ ዲብ ቦርተ ሐቱ ኩረት ሌጠ ለኣከ። ወእብሊ፡



ክልኢቱ ፍረቅ እምበል ጎል አስክ ዐለው። ናይ ሳልሳይ ደረጃት ለሐሐጥዋ ምኖም እግል ልትአመር

ህዬ ተልህው። ህጃማት ብሩድ እት ወዱ ህዬ፡ ደንደን በክት ኩረት ጀዘ እተ ለረክበው ዲቡ ወክድ፡ መተልህያይ አዱሊስ እብ እዴህ ለበልሰየ ኮቦሪት፡ በክት ሪጎሌ እግል ደንደን ተህየበት። እት ምግብ ሚዳን ክም መኪፍላይ ኩረት ደይር ማሲ ለዐለ ቢንያም መንግስት-ኣብ ህዬ፡ መስኦልየት እንዴ ነስኦ እት ጎል በደለዩ። ሰልፋይ ሾት ትልህዩ እብሊ ዲብ 43 ደቂቀት ለኣተ ጎል፡ እብ ሚርሒት ደንደን 1-0 ተመ። እት ካልኣይ ሾት፡ መተልህያይ አዱሊስ ሚሮን ብእምነት ለዘብጠየ ኩረት ሰኔት፡ ሓርስ ደንደን ኬብሮን ትእዝዝ ከደን ነፍገዩ። ለትወሰክ ጎል ሰበት ይዐለ ህዬ፡ ፊሪቅ ደንደን 1-0 ተወወተ። እት ትልህዩ መጃሚዕ አዱሊስ

መተልህያይ ደንደን ኤልያስ ተስፋይ ለሐሰ መተልህያይ ነስኦ። እብ ዓመት እትሊ ጅግራታት ሻምፒዮን ኮቦሪት እግር ነዋዴ ኤረትርፍ ኬሸን በረኸት ለሐሰ መተልህያይ፡ ዮራን ኪዳኔ ለሐሰ መደርብ ወዳንኤል ሚክኤል ለሐሰ ሓርሴ፡ ወመሰጅላይ አማዋል እብ 16 ጎል፡ ካልድ ዐብደላ ምን ናዲ አልተሕረር ትሰመው። ናይ ዐንሰበ ናዲ አልሂላል ህዬ፡ ጃእዘት ትልህዩ ዓድለት ነስኦ። እብ ዓመት እት ደንጎበ ለበጽሐ ፍረቅ አርብዒቱ ምን አቅሊም ምግብ ሰበት ቱ፡ ምግብ ሸበህ ሬሕ ለብእቱ አቅሊም ምንመ መስል፡ እት ኮቦሪት እግር ኩሎ አቃሊም ዐድነ እት መጃገረት ድቅብ ወሐራፊት ትልህዩ ባዴሕ ክም የህላ ቱ ለልኣርኤ።

ብድረ ዐጃላት እግል ዝከረት መትአንባት መድረሰት ሰውረት

ዝከረት 50 ሰነት መትአንባት መድረሰት ሰውረት እግል ለአንበተ ጅግራታት ርያደት፡ ለሐልፊት ሰንበት-ዐባይ 6 ሰብተምበር፡ ናይ ሐቱ መርሐለት ብድረ ዐጃላት እት ባኮት መአሰሰት ተእማናት ወደ። እሊ 62 ኪሎምትር ለገልበበ ብድረ ዐጃላት ሸክል እቱ አወላይ እንዴ አተ ለትዐወተ ምን ፊሪቅ ጽንዓት ተመስገን ብርሃኔ፡ ለተእሪካይ ካስ ነስኦ። ሙሴ ሚካኤል ምን ትጽቢት ወኡሰርም ክብርኣብ ምን ፊሪቅ አድማስ ደርቡ ለአተው ከመዳልየት ወርቅ ወአስራዲ ለትሰርገው ቶም። ናታን ሳምሶም ምን ደንደን፡ እሰይ ወልደፋፋኤል ምን ትጽቢት፡ ወሲዶን ከሰቱ ምን አድማስ ህዬ፡ ምን ራብዓይ አስክ ሳድሳይ ለአተው ቶም። ምን መትሳድረት አዋልድ፡ ዕዱ ናዲ ደንደን - ሮምና ግዑሹ እተ ዲብ 75 ኪሎምትር ለገኣት ጅግራ፡ ዲብ ሳዐት 37.2 ኪሎምትር እት ከይድ፡ እት ሾላተ ካቲመ እግል መትጃግራይተ ብርክቱ ፍሰሃይ ምን አራግ እብ ጸቢብ እንዴ ቀልበት፡ ዕውትት ኢዮቤል ዘሀቢ ዝከረት መትአንባት መድረሰት ሰውረት ነስኦት። ሃና አየሌ ናይ ደንደን ህዬ መዳልየት አስራዲ ነስኦት። አርሴማ ዐንደጸን ምን አራግ፡ ሰዛና ፍሰሃይ ምን ግብለት፡ ወራሄል ዐቅባይ



ምን አራግ አስክ ሳድስ ለሀለ ተርቲብ ጸብጠየ። ዐባይ ምንተሐት 23 ሰነት ውላድ 118 ኪሎምትር ዲብ ትጃገረው። መትሳድራይ ፊሪቅ ሰንበል ናኦድ በረከት፡ እት ሳዐት 44.9 ኪሎምትር እት ልትፈተት፡ ዕውትለ ዝከረት ገኣ። ንፍታሌም ኤፍሬም ምን ናዲ ደንደን ወሄርምን ኢሳቅ ምን ኤራቴል ደርቡ መዳልየት ወርቅ ወነሓስ ለረክበው ቶም። ሮቤል ሀብቱማርያም ወነባይ ፍሰሃይ ምን ፊሪቅ ግብለት ወኡፍሬም ዘርእጋብር ምን ደንደን፡ ምን ራብዓይ

አስክ ሳድሳይ ገኣው። ክሎም ዕወታም፡ ናይ ማል፡ ካሳት ወመዳልየት ጀዋእም ምን እት መድረሰት ሰውረት ለዐበው ለትፈናተው መስኦሊን ትክበተው። እምበል እሊመ እግል ፊቃዶለ ዝከረት እት ሚዳን ቦቾፊላ እተ ገብእ ለሀለ ጅግራ ኩረት-ሰለትመ፡ አዋልድ ፊሪቅ ግህተብ እግል አራግ 21 እብ 10፡ ግልዕ እግል ጆልሃንቲ 35 እብ 33 እት ቀልባህን፡ ውላድ ህዬ፡ ሳትረብ እግል ዐየት 59 እብ 52፡ ወቀብርወኣት እግል ዜሮ 62 እብ 49 ቀልበዎም።

ዋልታ እብ ኩረት እግር ወዲታሮ እብ ሾሊቦል አሽብረቀው

ጅግራታት ርያደት አቅሳም እዳሪት ውዛረት ድፊሶ፡ ማሌ-ሰህ ኣትኒን እብ ክልኤ ትልህዩ እትሉሉይ ዐለ። ምን ገጽ አስቦሕ ዲብ ናዲ ቦውሊን መዐስከር ደንደን ጅግራ ሾሊቦል ውላድ ገብኣት። ዒታሮ እግል ዋልታ እብ ርሐብ 3-0 እት ቀለቦም፡ ሐሊበት ወአራግ ለወደወ ትልህዩ፡ ለሐሰት ትልህዩ ውጅህት ናይለ ምዕል ዐለት። ሓምሳይት ወናይ ፈናታይ ዱረት ለሐሰት መጃገረት ለትረኤት ዲባ ተ። ሐሊበት ህዬ በክት እንዴ ወደው፡ እግል አራግ 3-2 እንዴ ቀልበው፡ ሰልፋይ ዐውቴሆም ሐጠጠው። ምን ገጽ ምሴ ህዬ ናይ አዋልድ ትልህዩታት ኩረት እግር ገብኣ። እሰልፍ ለተልህ ፍረቅ አዋልድ ህምቦል ወዋልታ ዐለየ። ፊሪቅ አዋልድ ዋልታ አሮት ጎል እብ ባና ወክልኣት ጎል እብ ዳናይት ፍጹም እንዴ ረከበዩ፡ እግል ሂምቦል 3-0 ቀልበሆን። ዒታሮ ወአባሓኒ እት ወደሆህ ትልህዩ ህዬ፡ ደሮን በሕ እብ በሕ ፈግረየ። እሊ ትልህዩታት ዮም አርቦሶም እብ ሾሊቦል ናይ ውላድ ወኩረት እግር አዋልድ ለአተላላ ውዕል ሀለ።

እት ህዬ ህዬ፡ ደንደን በክት ኩረት ጀዘ እተ ለረክበው ዲቡ ወክድ፡ መተልህያይ አዱሊስ እብ እዴህ ለበልሰየ ኮቦሪት፡ በክት ሪጎሌ እግል ደንደን ተህየበት። እት ምግብ ሚዳን ክም መኪፍላይ ኩረት ደይር ማሲ ለዐለ ቢንያም መንግስት-ኣብ ህዬ፡ መስኦልየት እንዴ ነስኦ እት ጎል በደለዩ። ሰልፋይ ሾት ትልህዩ እብሊ ዲብ 43 ደቂቀት ለኣተ ጎል፡ እብ ሚርሒት ደንደን 1-0 ተመ። እት ካልኣይ ሾት፡ መተልህያይ አዱሊስ ሚሮን ብእምነት ለዘብጠየ ኩረት ሰኔት፡ ሓርስ ደንደን ኬብሮን ትእዝዝ ከደን ነፍገዩ። ለትወሰክ ጎል ሰበት ይዐለ ህዬ፡ ፊሪቅ ደንደን 1-0 ተወወተ። እት ትልህዩ መጃሚዕ አዱሊስ



ሕመም ኢቦላ እግል ሚቱ ሐን መራቀብት ለይአት፤

እትሊ ወክድ እሊ ዲብ ዲሞቅራጥያይት ጅምሁርየት ኮንጎ፡ ተክተላሌ ለህሌት ገሽለት ሕመም ኢቦላ፡ ምን መራቀብት በረ ጋብአት ህሌት። ከመ ልትአመር አዜ እግል 17ይት ኢነት እብሊ ሕመም እሊ ትደመዕ ለህሌት ዲሞቅራጥያይት ጅምሁርየት ኮንጎ ዲብ መሻክል ትሩድ ኩሪት ህሌት። እሊ ሐቲ ምን ሕመም ኢቦላ እብ ብዝሐ ለሳድፈን ድወል አፍሪቀ ላተ ኮንጎ፡ አዜመ ለእብ ‘ቡንዲግዮ’ ለልትአመር ጅንሰ ኢቦላ መሻክል እጅትማዕየት ወእቅትሳድ ትሩድ እጅሩይ እተ


ለህሌት። እሊ ሻይረሰ እሊ ዲብ ሰነት 2007ወ 2012 ሌጠ ዲብ ኡጋንዳ ርኡይቲ። እብሊ ሰብብ እሊ ቱ አስክ እሊ ፍድኢት ለኢትሪክበት እግሉ። ምናተ እሊ ዲብ ዲሞቅራጥያይት ጅምሁርየት ኮንጎ ልዒ ለህላ ሻይረሰ እብ ገደደቲ ክመ ቀዳም ኢኮን። ሰኒ ጋይድ ቱ። እብ ሸፋገት ዐደዮሁ ዲብ አወላይት ደረጃት ርቱብ ህሊ። እብ አሳስለ ገብአ ድራሳት። ምን ዲብ ዲሞቅራጥያይት ጅምሁርየት ኮንጎ ለሕመም ለረክበዮም አንፋር 48% ሞተው። እሊ ህዩ ለሻይረሰ አክል አዩ ኬልም ክምቱ ለለክርኤ ቱ። ዲብ ሐልፈ ወርሕ ጁላይ መአሰሰት መራቀብት አድውየት ብሪጣንያ ናይ ሰልፍ ፍድኢት ድድ ሻይረሰ ቡንዲግዮ፡ እግል ጀርቤ እግል ተህብ እጅዝት ህሌት። እሊ ዲብ ምን 18 አስክ 55 ሰነት ለዓማርም፡ 50 እብ ምራድ ኖሶም ለመጽአው አንፋር ለገብአት ጀርቤ፡ ፍገራት ከፎ ከም ተ ለተአመረት አለቡ። ሰበቡ ህዩ፡ ለፍድኢት ዲብ አንፋር ለተአጀርዩ አሻይር ሐቆ ወክድ ረዩም ተ ለትትርኤ። ምናተ ገሌ ሰብ መቅደረት ናይላ መጃል፡ ሰአዮብ ለተህይብ ክምተ ወግም ለህይቤ።

ቀደም እሊ ዲብላ ትፈናተ አውካድ ልትርኤ ለዐለ ሕመም ኢቦላ፡ መብዝሐ ለትከርዑ ፍድኢት ህሌት። እብሊ ቱ ህዩ ዲሞቅራጥያይት ጅምሁርየት ኮንጎ አስክ እግል ቡንዲግዮ ለትከሪዕ ፍድኢት ትትዳሌ፡ ለእብ ዛዩር ለልትአመር ሻይረሰ ኢቦላ ለትከርዕ ፍድኢት እግል ትጀርብ አመት ለህሌት። ምን እሊ እንዴ ትበገሰት መዝመት ዓፍየት ዐለም ምን ሰምሐተ 70 አልፍ ‘ኤርፕር’ ለትትበህል ፍድኢት ሻይረሰ ዛዩር፡ 50 አልፍ ክብትት ህሌት። ለፍድኢት ህዩ ለተአደምዕ እግል ትግባእ መስኢት ገብእ። እሊ አስክ ገብእ ለበዝሐ ሰብ መቅደረት ዓፍየት ለሕመም እንዴ ኢመጽእ ናይ ዳፍዮቱ ምስዳራት እግል ልትነሰእ ክም ወጅብ ሸርሐ። እብ አሳስ ሐብሬለ ሰብ መቅደረት፡ እደይክ እብ ማይ ወሳቡን ሐጺብ፡ ለሻይረሰ ለረክበዮ ነፈር አጊድ ክም ልትከልከል ወዲ፡ አረይለ ሕመም ለትነፍዐ እብ እበር ወስርንጋት

እብ ደማን ለበ ገበይ ከም ልትነወክ ወዲ፡ ምን ዐደዮ ለነጂ ልባሱ፡ እስእን ወብዕድ መትነፋዕ፡ ወገናይዝ ናይላ እበ ሕመም ለመይት ነፈር እብ ዋጅብ ከም ልትቀበር ወዲ፡ ምን አግደ አግቡይ ዳፍዮትላ ሕመም ክምቶም ልትሸረሕ።

ሕኩመት ዲሞቅራጥያይት ጅምሁርየት ኮንጎ፡ ዲብ ረክሰለ እብ ሰብ መቅደረት ለትትህየብ ሐብሬ፡ ዲብ ሰሰ ለሕመም ለብእቶም አቃሊም፡ ሸዑብ ዲብ ሐቲ አካን እግል ኢልትጀማዕ ማንዐት ህሌት። ዝያድ 18.6 ሚልዮን ሸዑብ ለነብረ ዓሊመት ዲሞቅራጥያይት ጅምሁርየት ክንጎ ላተ መዲነት ኪንሻሰ ሐቲ ምን መናሰባት ወብዕድ ኡዳም ለጀምዕ ጋራት እግል ኢልግባእ እተ ምንዓት ለህለየ ባካት ቱ። እድንያይት መዝመት ዓፍየት፡ ዲብ ዲሞቅራጥያይት ጅምሁርየት ክንጎ ጃርየት ለህሌት ገሽለት እግል ተክብጥር፡ ሐድ 3.9 ሚልዮን ዶላር ተአፈግር ዲብ ህሌት፡ መርከዝ መራቀብት ሕመማት አሚርከ (ሲ.ዲ.ሲ.) ህዩ ዲብ ዳፍዮት ናይላ ገሽለት 319 ሚልዮን ዶላር እፍግርት ህሌት።

እሊ ክእነ ዲብ እንቲ፡ ዲብ ግሞራህ ላተ ኡጋንዳመ፡ ለገሽለት ጃርየት ህሌት። ለገሽለት ዲብ ወርሕ ኡብሪል እግል ሰልፍ ኢነት ዲብ ኮንጎ ሐቆ ትርኤት፡ ዲብ ኡጋንዳ 20 ነፈር ለሕመም ከም ረክበዮም ወብዕዳም ክልኦት ነፈር ከም ሞተው እብ ልትህደግ። እተ መደት ለህ ለበዝሐ ምን አረይ ዲብ ዲሞቅራጥያይት ጅምሁርየት ኮንጎ ሱፋራም ለዐለው ቶም። እብሊ ህዩ ሁጋንዳ ዲብ ዐድ ለገብእ ናይ ዋያራት ሰፈር አብጠረት። እብ በርመ ለዐድ ለልትሓደድ ድዋራት ከም ደብአቱ ልትዘክር። ለሕመም ዲብ ኡጋንዳ መደት 42 አምዕል ሰበት ኢትርኦ እድንያይት መዝመት ዓፍየት ኡጋንዳ ሐር ምን ኢቦላ ክምተ ረሰሚ አወጀት። ርዋንዳም ምስል ዲሞቅራጥያይት ጅምሁርየት ጎንጎ ለህላ እግል ሕዱድ ዳብኦቱ ህሌት። እብ ተውሳክ አሚርከ መዋዋኒ ዲብ ዲሞቅራጥያይት ጅምሁርየት ኮንጎ እግል ኢልሳፍር ትመንዕ እት ህሌት፡ ለዲብ ዲሞቅራጥያይት ጅምሁርየት ኮንጎ እንዴ ጌሰው ለለክቀብሎ ምድረ እንዴ ኢክይዶ እት ሳልሳይት ደውለት 21 አምዕል እግል ልጽንሐ



አማውር ሃይበት ህሌት። ከነዳመ እብ ሰብብ ገሽለት ኢቦላ ምን ዲሞቅራጥያይት ጅምሁርየት ኮንጎ፡ ግብለት ሱዳን፡ ወኡጋንዳ ለመጽኦ አንፋር አስክ 28 ሰብተምበር ማንዐት ህሌት።

ሻይረሰ ቡንዲግዮ ዲሞቅራጥያይት ጅምሁርየት ኮንጎ፡ ዲብ መሻክል አምን ትሩድ ዲብ እንቲ ምጽኦቱ እት ራቀቡቱ መሻክል ሳድፈ ህሊ። ሰበቡ ህዩ እብ ሰብብላ ፍንጌ

ኢቦላ ዲብ ዲሞቅራጥያይት ጅምሁርየት ኮንጎ ቀደም ገሌ አውርሐት እብ ሐዲሰ ሐቆ አቅብሎ፡ እብ ደረጃት ዓለም ፈርህት ጋብእ ህሊ። ሰበቡ ህዩ፡ ለገሽለት ምን ነፈር እት ነፈር እብ ሸፋግ ሰበት ትልዒ ቱ። ዲብ ወክድ ሐጨር አላፍ አንፋር እግል ልቅተል ቀድር። እብሊቱ ህዩ እድንያይት መዝመት ዓፍየት እብ ሰበትላ ሕመም ብዙሕ ሐብሬ ወምክር ተህይብ ለህሌት። ዝያድ ህዩ ዲብ አግቡይ ዳፍዮቱ



ሕኩመት ወሐሽም መትቃውመት ኤም 23 ገብእ ለህላ ሐርብ፡ ሸዑብ ብዙሕ ምን መሕደርሁ እንዴ ትሸዕተረ አረይለ ሕመም ገብእ ወእግለ ሕመም እት ብዕዳም ልዓድዩ ህሊ። እሊ እግል ምድር ፋዬሕ ዳብጥ ለህላ ሐሽም ስሉሓም፡ ዲብ ሐልፈ ወርሕ ጁን ለዲብ ሐን መራቀብቱ ለህላ ድዋራት ምን ሕመም ናጊ ክምቱ ዕሉን ከም ዐለ ልትአመር። እትሊ ወክድ ቅሩብ ዲብ እንክር ቅብለት አቅሊም ኪሹ ክልኦት ነፈር ሐቆ ትረክበው፡ ለሐሽም ዲብ አቅሊም ለትፈናተ መምርሕ ለህይብ ህሊ። ለበዝሕ ክፋል አቅሊም ኪሹ ምን ሐልፈት ሰነት ዲብ ሐን ሐሽም ኤም 23 ህሊ።

ትከድም ለህሌት። ዲብ ሐልፈዩ 50 ሰነት ሌጠ ዲብላ ትፈናተዩ ድወል አፍሪቀ ዝያድ 15 አፍል ነፈር እበ ሕመም ሞተው። ዲብ ዲሞቅራጥያይት ጅምሁርየት ኮንጎ አስክ እሊ ዝያድ 5,500 ለሕመም ረክበም እት ህሊ፡ ዝያድ 2,900 ሞተው፡ ዝያድ 1,300 ህዩ እበ ገብአት እግሎም መራዐየት-ዓፍየት ከም ሐየው ልትሐበር። እብ አሳስ ተቃሪር ዓፍየትላ ዐድ፡ ምን ሰነት 2018 አስክ 2020፡ ሐድ 2,300 ነፈር እበ ሕመም ሞተው። እብ ዓመት ምን ሰነት 2014 አስክ 2016 ዲብ ምውዳቅ ጽሓይ አፍሪቀ ሌጠ 28,600 መዋጥን እብ ሕመም ኢቦላ ሞተው።

ህሊ። ‘ቡንዲግዮ’ ዲብ ኡጋንዳ ለህላ አቅሊም ዲብ ገብእ፡ እሊ አዜ ሱዳን ለህላ ኢቦላ ሰልፍ ዲብ ሰነት 2007 እተ አቅሊም ሰበት ትርኦቱ ስምለ አቅሊም ናስእ ለህሊ።

ዶል ዶል ለሳድፍ ሕመም ኢቦላ አሮት ምን እብ ሻይረሰ ለለዐዴ ሕመማት ቱ። ለበዝሕ ወክድ ህዩ ሐዋናት ረክብ። ዝያድ ህዩ ዲብ እብ ዕውር-ላሊ ናይ ፍሬታት ለትትአመር ጅንሰ ዕውር-ላሊ ረክብ። አዳም እሊ ሐቆ በልዐ ለሕመም ምን እግል ልዕዴ እቱ ቀድር። እብ ትምታመትመ ለዐዴ። አሻይር ኢቦላ ምን ለዐደ እተ አምዕል እት ክርስ 21 ምዕል ለልትርኤ ገብእ እት ህሊ፡ ሰልፍ ለለክርኤ አሻይር፡ ሰዕለት፡ ሐዝ ድቁብ፡ መጺጸት ሐንገል ወምን ቅያስ ወለዐል ተዐበት ክምሰል ቱ ሐካይም ልሐብር። ለሕመም እት ልትኬለም እተለ መጽእ እቱ አውካድ ህዩ፡ እግል ገሌ ንዋያት ኩብድ እግል ለአድሚዕ ወፍጋር ወጠርሽ መዋመጦር ሕድ እግል ለአጅሬ ቀድር። ሐት-ሐቲ ዶል ህዩ ናይ ክርስ ወግዳም ነዚፍ ደም ለአጀሬ።

ገሽለት ኢቦላ ‘ቡንዲግዮ’ ሐቆ ዐስር ሰነት ቱ ዲብ ዐድ ትትርኤ

